

東
華
續
錄

光緒四十八

臣朱壽朋敬編

臣潘鴻鼎恭校

五月丙戌朔賞前督福建汀漳龍道王廣業頭品頂戴准重赴恩榮筵宴○丁亥命劉長佑等飭令道員沈壽榕帶兵出境與廣西官軍聯絡聲勢保護越南○庚寅陳啟泰奏各省請停分發誠有見於冗員之多其妨吏治賢否混淆日形壅滯以致奔競成風廉恥道塞一缺出而謀幹者數十員一局開而求差者百餘輩未得則汲汲鑽營既得則孜孜爲利雖人心之千古亦積弊之勢使然也近見閩省奏准考試章程以酌留四五成爲率遵奉部章破除陋習察吏之道莫善於此使各省盡如此辦理方可責馴吏以廓清仕途振興吏治之效應請 申諭各督撫於考試人員仿照閩省辦法各按本省人數或留二去八或留三去七至寬亦以四五成爲定破除情面分別去取無稍寬濫旌別既嚴人爭自勵亦不必輒以停止分發爲請矣 上諭御史陳啟泰奏各省考試官員請仿照閩省章程辦理等語著吏部議奏○辛卯大祀地於 方澤遣本格恭代行禮○林肇元奏竊照御史胡降洵以軍務肅清已久各省興養立教諸政次第舉行請將盜劫案內法所難宥情有可原者仍照分別首從舊例辦理奏奉 諭旨飭交刑部議

奏旋經部臣以法貴去其太甚事必急所當先必欲復情有可原舊例莫若將就地正法章程先行停止請旨飭下各省督撫將軍都統府尹體察地方情形將夥眾持械強劫案件仍照成例解由該管上司覆勘分別題奏請旨不得先行正法迅速妥議具奏等因光緒七年閏七月二十五日奉本日奉旨依議欽此欽遵咨會到黔督同臬司易佩紳體察地方情形悉心酌議伏思政典之寬嚴與刑章之緩急行連類而相因若果盜風稍息則能復情有可原之舊例即可停就地正法之新章蓋雖宥之法既有以可原之情則去辟無多即一律覆勘不難因制若可原之情亦不能不斷以難宥之法則紛紛報解者皆駢誅之六魄即噴噴多故者是鉅險之累因黔省積亂雖平伏莽未靖半屬無歸之游仍半為結會之匪徒夥眾持械強劫各案層見迭出原之則受害者既不公平尤者更不能懲不原之而一一解省覆勘此等必死之罪誰不求生或翻供以圖遷延或結黨以肆邀奪震驚道路被累罔憚不勝防害將滋甚部議謂復情有可原之例宜先停就地正法之章復審時度勢似難遷變極宜之計查前准部議嗣後拿獲馬賊土匪並夥眾持械強劫案件如實係距省遠解犯堪虞就近解歸該管府道覆審明確免其解省由該管府道核明情罪稟候督撫札飭就地正法按季彙案具奏其餘距省較近州縣獲有前項案犯該地方官務須申詳該管上司解省審勘由督撫題奏俟奉旨後再行處決等因黔省行之兩年尙無

冤濫仍應查照前准部議辦理一俟盜風稍息卽當遵復舊制以副朝廷明慎用刑之主意下刑部知之○壬辰恩承因病請開總管內務府大臣步軍統領及管理刑機營事務差使九之○以麟書爲步軍統領○召劉長佑入覲以岑毓英署貴州總督張兆棟署福建巡撫○諭理藩院奏請飭拿要犯一摺據稱冒領蒙古卹案內要犯理藩院已滿書更高紹周卽高振亭現在訪查並無蹤跡該犯籍隸安徽請飭緝拿歸案等語卽著安徽巡撫飭屬將要犯高紹周卽高振亭嚴緝務獲解部審訊並著理藩院及步軍統領衙門順天府五城御史仍遵前旨設法嚴拿歸案究辦○諭兵部奏已革書吏因案傳訊不到請飭拿究一摺兵部已革書吏陶業英卽陶金爵於充當經承時賄收收受銀兩擅將文札等件延擱經年私交差弁帶至甘肅追經發覺傳訊復敢置不到案實屬膽大妄爲藐法已極著步軍統領衙門順天府五城御史飭屬嚴緝務獲送交刑部訊明懲辦該犯籍隸浙江並著陳士杰飭屬一體嚴拿解部訊辦○甲午左宗棠奏兩江郡縣戡亂已久江甯省會克復又已十有九年所有習後各事宜經前任督臣先後悉心經理條緒可尋卽以衰朽之姿猥承其後何容妄抒臆說非薄前人然自履任以來目見民間風氣凋殘景物蕭索實有惻然於中不安寢處者江北受禍最深田疇荒廢窮餓之餘流爲盜賊劫盜之案何日無之糾之以猛不足止奸治之從寬適以釀亂卽出巡之餘目擊瘡痍滿目生計蕭條幸連歲春花秋

稼薄有收成而穀價過賤民農猶以為苦其轉徙外出另覓生計者所在有之極貧之民則扶老挈幼趁食乞賑無論鹽課習以為常省城每歲各賑冊報丁口約兩萬計各府州縣善堂及各局所給之賑不在其內可見貧苦無以自存者多市廛百貨翔貴貿易獲利殊艱因此閉門歇業或赴各繁富口岸別覓生理或徑出洋營利久之遂成游手水次船戶專以賸載為生自輪船行駛長江各省亦置備火輪以資運用於是出入江海華洋相雜往返如織賈客爭趨而江船水手盡失其業無以謀生故謂兵燹之後富變而貧貧者轉為極貧而求流將有不可言者若不亟籌養民之政專以賑恤為仁是以乞丐視民非惟無此政體亦將何以為計謹按兩江治內之策莫要於理財而理財之方莫先於治水行鹽兩事誠以水利興可溉田而濟運鹽引復可裕課而便民其為利固可大而可久也將言治水於江北鹽鉅工繁兵燹之餘既不能藉資民力又不敢遽請部款而司運各庫所存正雜各款均係儲備要需而未便任意指撥籌維再四設措殊艱按淮鹽改票試行之初諸領者少每票僅繳額銀五百兩此外票商報効捐款陸續合計數十萬兩商意在壟斷居奇每以票多銷滯為詞阻撓加引官司受其朦混羣應加引必致壅滯難銷適足累商而誤大計遇有新商請票輒堅持原定新章拒之其實金陵兗復十餘年兩淮引地生齒日繁官引早應遞加以復課額不俟今日也臣出示試辦加引各岸商販請票踴躍比卽批准並權其

獲利厚薄實在情形增減票費飭令按引岸分起繳存司運各庫作爲另款儲備提撥現已積成鉅款餘均限期陸續全繳計江北治水及各處營作工程應需經費均可於票費撥節支用毋庸列款請銷竊冀百廢可興地方漸有復元之望仰紆 宵旰憂勤報聞○乙未以奕劻署鑾儀衛掌衛事大臣瑞聯署正黃旗滿洲都統○丁酉以松莊兼署禮部右侍郎敬信署正黃旗蒙古副都統○諭大學士刑部奏會同審明妄拿無辜毆辱士類之兵丁按例定擬並查明原參各節一摺此案步軍統領衙門技勇兵和清因奉派訪拿綽號人犯小軍師古香臣輒將伊兄舉人古銘猷鎖拿扭打並喝令崇鳳等攔毆多傷實非私拷平民可比自應加等問擬著照所議革去技勇兵七品頂戴杖一百流二千里卽發黑龍江當差崇斌海善成祿隨同妄拿無辜抓踢鎖毆均著照擬革去技勇兵杖一百徒三年恆嵩松海崇山文福富壽奇昌巴唐阿隨同押走並未毆打均著照擬革去技勇兵杖九十徒二年半委步軍校德昌將並未犯事到官之舉人擅加箠銬看守著交部議處翼尉連祥未能覺察非尋常疏忽可比著交部議處委翼尉恩昌明知古銘猷不應傳案仍派役往傳已屬謬妄並不訊明兵丁滋事實情扶同捏飾著交部嚴加議處署步軍統領左翼總兵戶部右侍郎崇禮於所屬司員營弁不職漫無覺察降旨交查之案並不確切查明僅據捏稟之詞率請交部訊辦意圖委卸迴護掩飾著交部照例議處署左翼總兵容貴右翼總兵文

秀隨同具奏亦難辭咎均著交部分別議處戶部郎中邵承瀚雖無勒索規費情事惟曾被人以誘賈押妓合謀誑騙等情控告有案實屬行止污下有玷官方著卽行革職刑科給事中師長灼身列諫垣屢次被人參奏難期稱職著勒令休致已革主事師岱雖無勾結番役實據惟素不安分業經伊父師長灼囑令回籍確保不潛匿在京著步軍統領衙門順天府五城御史一體訪查驅逐回籍交地方官嚴加管束不准出外滋事○寶廷奏 本朝制度滿漢並用從前八旗人材輩出凡漢員所不能辦者往往滿員每能有功今則大異於昔矣夫外省尙可不分滿漢京官滿漢並列不能通融合十八省漢人而取之猶未必人盡稱職旗人之數不敵一府亦必勉強備員豈免濫竽之謂此時如此日後可知近年八旗文風未見大遜於前何以消乏如此推原其故一由於官學廢弛教員無法雖不乏讀書應試之人而專攻舉業所學皆非所用一由於開捐以來進身太易捐一筆帖式謀入檔房但能奔走攀援雖目僅識丁不十年即可富貴縱有聰明可造之才沾染陋習亦漸趨於輕浮卑佞故有謂檔房爲汨人之淵語雖近激非過論也今欲培八旗人材必自整頓官學與筆帖式始整頓官學前已有 旨交議至筆帖式則尤不可緩之圖八旗就此途者較他途爲尤多必當亟加整頓整頓如何惟教之習例而已查考試筆帖式定制極嚴今則搶替傳遞無弊不有清理非易既未能遠清其源似不可不亟疏其流近來堂官視筆帖式如吏

役往往不屑整頓卽有心整頓者亦不過嚴緊考勤簿再就令筆帖式日日到署迎送堂官所習仍奔走伺候於公事何益乎於筆帖式何益乎是仍導之爲輕浮爲卑佞也考試難於核實不如核之於到部如做外省分發佐雜佐貳到省考試之法變通試之凡筆帖式到部不論實缺候補捐納考取一律試以滿漢文必大致通順方准作爲到部其太荒謬者駁回令自學習三年再赴部考試如仍不通仍駁回學習一年再赴部考試必能通順方准留部學習三年期滿奏留亦必遵例認真甄別不准虛應故事如到署考試與奏留甄別不認真者堂官以臆徇論各部立學例館擇司員之深於例者派充教習不分漢滿合一署筆帖式皆使習例漢文淺者先教之習漢文每月堂官考之分別優劣每季再考年終大考優者酌予烏布劣者酌開烏布三年京察以例案之生熟並差使之勤惰分別等第題升主事其不願習例者縱繙譯精通差使奮勉雖保一等但予別項差使不准題升主事主事者員外郎郎中之階行將主稿掌印安有不通例案而克勝任者近來滿司員中半皆備員公事但恃漢員與書吏主持不習例故也聞直隸按察使剛毅在部時專心習例從學甚多及官外任甚有政聲則習例之故也果能認真習例不十年六部當添許多幹練滿員異日府道封疆何至有乏材之患哉或謂滿之有筆帖式如漢之有書吏無須習例但重滿文夫使終身但爲此官固不必深求如欲爲司員則不可不習例矣而況積資累俸內可以正

撥席外可以領兼圻乎習之法某司行走卽習某司之例異日精通卽可掌某司印主某司稿如才力有餘願兼習者聽之其限於才力不願習例者亦聽之或慮因此恐有繙譯廢弛之弊不知漢文不通未有能通滿文者從前筆帖式重滿文者恐其求工文詞而致荒滿文非謂不必通漢文不必諳例案也今責以通漢文諳例案則曰吾習滿文及考以滿文則又全不通曉竊不知其何所習也三年考試之法具在但能認真甄別又何慮繙譯之廢弛乎伏讀乾隆二十九年 聖諭近聞各部院辦事惟司員說堂書稿而各司筆帖式經年不得常見堂官其所熟悉者不過跟班數人而已筆帖式將來俱可陞用司員若該堂官未經謀面而遇有保題陞用之處止以司官之言爲憑於理未協該堂官自應於筆帖式內留心察看遇有堪以造就尙能辦事者時加訓勉以期有成等因欽此又伏讀雍正五年 聖諭各衙門筆帖式俱係辦事將來陞用堂司之人雖經考取必當慎重揀選人材補用方於部務有益等因欽此仰見列聖培養人材至意足徵筆帖式非但當習滿文而必講求部務矣夫造就之方揀選之法亦惟是教之習例而別其能習不能習而已八旗人材所關甚大培養之要在此二者乃筆帖式積習過深尤當亟加整頓伏乞 飭軍機大臣詳酌妥議斷自 宸衷如可采擇卽乞 嚴飭實力施行不許虛應故事似無庸更下部議大部堂官差務殷繁多此一舉未免更增勞劇然諸臣皆受 國厚恩滿員固當以培植後

進爲己任卽漢員亦不至有膜視之心想皆以是說爲然也 上諭侍郎寶廷奏筆帖式積習過深而宜整頓一摺各部院衙門滿漢司員均應熟悉例案實力請求筆帖式爲旗員進身之階亦宜勤加學習以資造就若如所奏近來筆帖式往往習於輕浮僅供奔走滿漢文每不通曉似此積習相沿於政事人才均有關繫自應認真整頓嗣後各衙門堂官於筆帖式到署後卽飭令將例案留心講求並酌定章程認真考試分別優劣予以勸懲至學習期滿時尤當嚴加甄別不得虛應故事率行奏留吏部辦理考試筆帖式並嚴密稽查以杜掄替傳遞等弊該侍郎所請設立學例館之處著毋庸議○己亥諭前據翰林院侍講學士陳寶琛奏福建候補知府蔣鳳藻有鑽營鑽保仰娼聚賭等情澎湖通判鮑復康改名牒捐辦賑恐有侵蝕當諭令何璟等分別查辦茲據何璟等查明蔣鳳藻等被參各款據實覆奏並聲明興化府員缺應否扣歸部選蔣鳳藻另行補用請旨遵行等語此案蔣鳳藻鮑復康被參各節既據查明均無確據卽著毋庸置議仍著何璟等隨時查看該員等有無劣跡卽行從嚴參辦其福建興化府一缺卽扣歸部選蔣鳳藻著留省另補前經吏部議准以蔣鳳藻補授興化府知府之處著毋庸議○任道鎔奏山東候補人員仍形擁擠請再停分發一年下吏部議奏○壬寅諭吳大澂奏特參統兵大員發餉稽延請交部議處一摺甯古塔副都統德平阿於所統各營應領上月分餉銀遲至五月尚未發給並有將餉銀

寄存錢鋪故意稽留情事實屬不知體恤士卒咎無可辭德不阿著交部照例議處以示懲儆○癸卯諭
禮親王世鐸等奏會同盤查內銀庫完竣一摺此次該王大臣會同管庫大臣將內銀庫銀兩逐細批查
按原存數目計短銀七百五十兩庫儲帑項豈容虧短絲毫應如何著落賠補之處著戶部議奏內庫重
地關繫緊要嗣後派出查庫王大臣務當認真盤查嚴防弊混並著前鋒統領護軍統領隨時督飭所屬
實力稽查毋得稍有疏懈以昭慎重○何璟等奏光緒七年十月十五日准刑部咨議覆御史胡隆洵奏
請將盜案仍照舊例辦理一摺行令各省體察地方情形將夥眾持械強劫案件仍照成例解辦不得先
行正法妥議具奏等因鈔摺咨會到閩遵即行據署按察使葉永元核議具詳前來臣等查閩省山海交
錯最易藏奸如臺灣孤懸海外民番雜處時有土匪乘隙倡亂聚眾圖逞內地下游如興泉漳三府民情
獷悍游勇充斥夥眾持械搶劫頻仍其上游延建邵一帶五方雜處每逢茶市並有各省客民沓來紛至
備工操作良莠難縈追茶市收場歇業之游民往往散處草莽潛匿山嶺伺隙劫掠為害閩閩甚有殺傷
釀成重案是以同治八年暨十三年兩次接准部咨仍照舊例辦理經前督撫臣及臣何璟覆奏欽奉
諭旨仍准拿獲訊明後就地正法在案現在地方雖已肅清而盜風尚未止息游勇土匪動輒竊發滋事
若遽行改歸舊例解省審勘此等匪徒罪大惡極黨羽尤多誠恐距省萬遠州縣長途押解不特疎失事

廣而顯戮久稽亦無以示懲儆臣等細心體察情形擬請嗣後各屬如有拿獲盜匪游勇及會匪土匪等犯或夥衆搶劫殺斃事主或拒敵官兵情罪較重巨案仍欽遵前奉 諭旨於訊明後就地正法俾兇頑知儆閭閻獲安一俟盜風稍息再行奏明照例辦理此外尋常搶劫等案仍遵定例解勘以重人命而免枉縱下刑部知之○穆圖善奏本年二月三十日接准戶部咨雲南道監察御史鄧承修奏爲庫款支絀請查關稅侵蝕以裕國用而杜漏卮一摺光緒八年正月十六日內閣奉 上諭御史鄧承修奏請飭查關稅侵蝕以裕國用一摺等因欽此欽遵鈔錄原奏轉飭遵照確切查明據實覆奏等因咨行到閩奴才跪聆之下仰見 朝廷慎重關徵籌備餉需之至意竊維設關徵稅爲 國家維正之供奴才責在督徵當此餉需支絀苟可多徵一分即多得一分之餉何敢不竭力徵解共濟時艱謹將閩海關徵稅情形敬爲我 皇太后 皇上縷晰陳之溯自道光二十三年閩海議准通商開徵洋稅以來常稅多被侵佔歷經各前任將軍督撫諸臣據實陳奏早在 聖明洞鑒之中奴才先於光緒六年二月間履任後接准部咨議奏籌備餉需一摺通行各省關於徵解足額外仍按年量力溢解遵經確切查明瀝情奏覆並嚴飭各口設法整頓實力奉行計六年分關滿據報徵收比照五年分多徵銀八千八百九十兩零七年分關滿比照五年分亦多徵銀八千六百三十餘兩此兩年中核之原定正額雖未足數然所短均祇數百兩

比較從前漸有起色從中實已竭澤而漁且查各前任於常稅細額時歷援奏准成案由洋稅項下按年撥補銀二萬五千兩迨奴才任內所請撥補之款較前轉少因之比往屆雖屬多徵而按照定額仍難溢解至閩關稅務向係貢成六總口協佐委員分駐督徵茲以奉前因當經奴才轉飭各該口委員懷遵部章悉心稽查務期剔除弊竇勉籌溢解上副宸廑旋據南台各口委員協佐領等先後覆稱常稅不能溢額之故實由華商運貨交搭洋船且近年三聯單暢行洋稅之佔徵倍甚兼之招商局夾板輪船所載華貨歲計徵銀數萬兩又係另欸造報不歸常稅之例此盈彼絀勢所固然至前人設關立法至周至密如進口船隻必先由外貼驗貨色件數起給清單封艙蓋戳轉送總口憑單稱驗斤兩照會徵稅單貨相符方准起卸若出口貨物先由稅行帶客報關按貨和驗計重徵稅起給紅單船到外口照單覆驗並無夾帶方准放行一紙稅單皆經眾人耳目倘有侵蝕眾所周知如合百十人以分肥而職守者豈肯獨任其咎倘歸一二人以中飽而環指者必將立發其外委員等具有天良敢不矢勤矢慎涓滴歸公精圖報稱等情前來奴才詳加體察並密派親信明詢問訪所稟各節尚屬實情委無侵蝕中飽情弊伏念各省關稅事務中外疑義已非一日而閩省口岸各係專員辦理與他省情形不同所有各該口按月送到徵收稅冊迭經奴才嚴加考核認真比較如有多徵即令儘解稍有短絀亦必責令賠償且不時派遺委員

確查尙不至徵多報少究覓常稅之溢解不前者非華稅之不充乃分投於夾板洋船之中報徵洋稅溯查光緒六年分洋稅較五年分多徵二十四萬餘兩七年分較六年分又多徵三十四萬餘兩益於此故損於彼洵爲侵占常稅之明徵其常稅如同治五年間歲只徵銀七八萬餘兩前任將軍臣英桂臣文煜遂漸旺徵遞年由七八萬兩增至一十四五萬兩前署將軍督臣何璟暨前任內則徵至一十八萬五千餘兩較之往屆已屬溢徵本年再得充盈便可敷足額而期溢解奴才世受 殊恩深知籌餉艱難斷不敢自蹈舊尤任聽吏胥侵蝕臣何璟臣岑毓英共事同城見聞切近倘果如該御史所指陳亦必破除情面立予糾參不敢扶同隱匿報聞○甲辰諭軍機大臣等丁寶楨奏遵旨飭催藩司赴任並令酌帶藩部兩營入滇一摺滇省邊防緊要前據劉長佑等奏已派遣員沈壽榕帶兵出境相機籌辦唐炯奏稱知兵著准其酌帶藩部兩營赴任該藩司經朝廷特簡所有滇省一切應辦事宜著劉長佑岑毓英杜瑞聯飭令悉心規畫妥爲經理以期固圉安邊藉杜外人窺伺其帶往兩營應如何布置扼紮著劉長佑等體察情形隨時與該藩司商酌辦理將此由四百里各諭令知之○乙巳諭前據內閣侍讀學士文碩奏稱河南學政廖壽豐恒斥革欠考生員一案言官挾私妄奏撫臣查覆瞻徇等因當交都察院堂官會同禮部兵部查奏茲據查明覆奏請旨辦理各省文武各生三年歲考一次無故不到例應斥革所以考優劣而示

勸懲此次湖南省斥革欠考各生人數較多其中有因災後轉徙流離未能如期赴試者其情不無可原
著該學政詳細查明欠考年分是否實因災荒有無規避情事分別辦理其報捐出學之文生包宗模等
冊報等第之武生路昆錦等何以仍註斥革及列入患病游學項下著分別查明將歷任學政及各學教
官查取職名交部議處廖壽恆未能查出亦屬疏漏著一併交部議處此後各省學政每屆歲考仍應遵
照定例辦理其有因欠考三次經該學政斥革者不得藉詞援引率請開復以符定制葉陰昉李鶴年既
據查明並無挾私瞻徇情事均著毋庸置議餘著照所議辦理兼署禮部右侍郎松淮已到署任竟不與
議列銜向來無此體制兼署禮部左侍郎徐卬與廖壽恆係屬姻親應否迴避並未先行奏請亦屬不合
均著交部議處○內午張樹聲奏直隸候補人員仍形擁擠請再停分發一年下部議奏○戊申調敬信
為兵部右侍郎福銓為刑部右侍郎○調崑岡為正白旗滿洲都統以慶福為正白旗漢軍副都統○調
恩福為戶部右侍郎啟秀為盛京戶部侍郎寶森為盛京刑部侍郎以鍾濂為盛京兵部侍郎○諭兵部
吏部奏遵議處分各摺片署步軍統領左翼總兵戶部右侍郎崇禮應得革職處分加恩改為降三級調
用署左翼總兵容貴右翼總兵文秀應得降三級調用處分加恩改為降三級留任委步軍校德昌著照
部議降三級調用不准抵銷翼尉連祥著照部議降二級留任准其抵銷委翼尉恩昌著照部議卽行革

職○諭前據銘安奏吉林添設道缺事屬創始政務繁難並詳陳道員顧肇熙熟悉情形洵堪勝任等語吉林分巡道員缺卽著顧肇熙補授此次係因新設員缺是以俯如所請嗣後不得援以爲例遇有缺出仍著請旨簡放○己酉諭傅廡等奏應修各工請派員查驗等語 孝陵宮門內並 陵寢門內及 寶城等處均有應行急修各工著派徐用儀敬謹查勘奏明辦理○辛亥京師旱 上詣 大高殿祈雨○雨○壬子劉長佑等奏奉三月十五日 上諭總理各國事務衙門奏法越兵端已起亟宜通籌邊備以弭後患一摺據稱張樹聲前報二月十四五等日突有法國兵船由西貢駛至海陽盤構攻取東京等語越南孱弱已甚果法人意在併吞該國萬難自全北圻各省與滇粵毗連若法人盡占北圻則藩籬盡撤後患將無窮期惟事體重大應如何策出萬全之處著就現在情形參以該衙門所奏再行通盤籌畫悉心妥議迅速覆奏候旨施行法國意在由富良江通商雲南保勝一帶實扼要之地防務尤緊著劉長佑杜瑞聯懍遵幾次諭旨嚴密防維相機因應以杜窺伺而固邊疆等因欽此欽奉之下仰見我 皇上備豫不虞謀定後動之至意卽應欽遵迅速覆奏追緝閩總理衙門原奏所議與 臣等前摺意見大抵相同又以越國自三月初八日失東京後尙無緊要探報情形未克周知是以未卽覆陳一切連日接據統領防軍候補道沈壽椿據查探邊情委員候補州同陳成文候補知縣王德中等稟稱探聞法人破東京

後退駐輪船每日添兵並潛招盜懸賞格萬金購劉永福十萬金取保勝州又法領事於破城後至商
政衙門刼掠一空傳文知照各商出入貨稅另有新章現仍調取陸軍造成拖船爲西取保勝之計現在
越王派兵部侍郎陳廷肅接署河內總督遺吏部尙書阮正等抵山西與黃佐炎等籌商事件各省巡撫
布按大半同黃佐炎劉永福之議願與決戰連日調取保勝各營軍械東赴山西等情嗣後得廣西撫臣
慶裕先後兩寄統領防軍提督黃桂蘭報稱劉永福馳赴山西與總督黃佐炎等商畫禦敵之策道經諒
山來見該提督曉以忠義感激奮發擴稱分兵赴北甯助守保勝有伊防軍萬不使法人得逞惟兵力不
足望 天朝爲援其河內探報云法人恐援兵猝至當釋所獲之河內巡撫交還城池倉庫巡撫不受耕
法人違約弄兵以死自誓乃轉交該國按察使宗室院瀾復將東京城用火藥盡行轟毀以免越人復聚
且省力分守其輪船或東下海陽或分駛廣南西貢俟添兵既集從事上游等情臣等伏查法人已焚掠
東京狡謀縱越南諸臣決計主戰亦熟籌利害之見山西爲上通雲南扼要之地該國官軍能於該省
悉力抵禦微特粵邊防可保門戶卽越南大局亦尙有振興之期而粵督與總署所議區畫北圻一策
更可乘勢早圖以杜窺伺然越國受制已久人心恒怯此次決戰山西期於必勝稍有撓敗不堪設想蓋
該省有失則法人西入三江口不獨保勝無復障礙而滇省自河底江以下皆須步步設防益形勞費且

越臣主戰者雖多而中無所持必有疑慮之意改圖和議一授以保勝則滇邊接連通商之議曉曉或進至興化則法人氣驕敗逃之將更難處置以事機而論中國有萬難坐視之處且不可待山西有失始爲事後之援臣等至愚亦以前摺尚未奉到 批諭不敢輕動但令沈壽榕於戍邊各營酌撥隊伍往來該國境上適爲聲援並令沈壽榕查看竄近滇邊土匪情形分派練兵前往擊捕以爲出師進規地步藉以固彼人心壯彼士氣如該國附近滇邊各省前來乞援擬卽查照廣西防軍移紮北甯之例進駐宣光興化兩省爲遠防不如近堵之計且可隨時策應就地規畫一如總理衙門所奏不可坐失事機以成不可收拾之局侍講張佩綸所奏扼險以伺利便當否仍候 聖裁臣等現仍函致廣東督臣將原議區畫北圻詳晰見覆並函告總理衙門以滇省不可通商情形請斟酌機宜據實陳奏爲先定之謀又函詢廣西撫臣以劉永福與該國經略等商議之策已否有定並約招降陸之平等以免外叛滇粵兩軍當聯絡聲勢之意一俟得有機要卽當奉 命出關不敢稍涉遲疑以致貽誤總之非滇粵併力以圖不能救越國之殘局非水陸同時並舉不能阻法人之實謀非 聖心決策於先不能收捍邊保小之實效臣等於初覆奏摺內已縷陳之惟 朝廷迅賜裁示前張佩綸奏稱滇粵邊防宜責粵督治水師爲奇兵廣西雲南治陸師爲正兵扼險以伺利便其時法人尙未興兵而先事之防若彼今河內既失法人出入海陽如涉

無人之境苟欲區畫北圻先杜窺伺非移水師巨艦於安邦神投海口不足以爲控制而昨接兩廣督臣張樹聲來函云東省輪船祇能駛行淺洋擬購備新式堅船而庫儲匱竭尙須籌款集事臣等竊意二十年來購製輪船鐵甲原以備緩急之用今越南之安危決於旦夕尙待籌款購備何以拯目前之患乞皇上勅下津滬浙閩各口輪船分撥瓊海前赴該國以期爲指臂之助或卽如張佩綸所奏與越人相聯絡以遙爲兩路聲援簡擇銳師揚旌渡海則法人有投鼠之忌此臣等之所望定於聖斷者也至滇省爲緬寧貢道與越南向無交涉事件視廣西之使命常蒞者有間卽以現在防軍而論臨安開化各邊與該國東京太原相距甚遠惟保勝與河口僅一水之隔而劉永福久未回營臣等疊經委員前往開諭該營將弁不得要領且臨安自蠻耗以下開化自古林箐以下巉巖邃谷種夷雜居草木盛長溪深水熱瘴癘蒸道多艱毒士卒居之輒嬰痼疾將來進紮於該處水土未審能否相宜若聖裁已定三省出規北圻則滇兵擬由廣南之者賓迅開化之馬白迅等處南出宣光或者瘴癘稍減庶於粵軍有輔車之勢而該國得以收借一之功且法夷孤軍深入四面皆敵自用兵阿非利加以來中實疲敝其忽攻忽輟實以觀中國之進止但得皇上赫然奮其威怒以三省水陸之兵入該國北圻屯駐助彼聲威必將乘我聲之未開與越人爲改盟之計抑或慮彼疆之糾梗於滇邊廢通商之謀杜窺伺於無形固邊疆於未擾

不獨邊軍不至於戰即邊地亦不勞於防推測夷情固可見之 皇上俯賜察導為先機弭患之謀
上諭軍機大臣等劉長佑杜瑞聯奏通籌相機弭患並增募練軍八營各摺片法越揭發而粵邊防緊要
疊經諭令該督撫等妥為籌備並前據劉長佑等派員帶兵出境以剿辦土匪為名相機保護亦經諭令
該督撫等體察情形妥籌辦理惟關外軍情隨時變易要在詳審緩急機宜妥籌因應著劉長佑杜瑞聯
就現在兵力密為布置藉作聲援免致彼族狡焉思逞並飭令道員沈壽榕確切偵探妥慎籌辦不得稍
涉張皇其增募練軍八營務當認真訓練俾成勁旅以資調遣會國荃岑毓英此時計已起程赴任著俟
抵任後各將該省水陸邊防事宜悉心規畫通籌全局彼此聯絡聲勢會商辦理將此由五百里各密諭
知之○癸丑諭軍機大臣等現在法越構衅演省邊防至為緊要劉長佑著俟岑毓英到任後再行來京
○甲寅又雨○予故正藍旗滿洲副都統雙印祭葬

六月乙卯朔以京師得雨 上詔 大高殿報謝○丙辰予故署廣西巡撫林則徐於江蘇江甯建祠○
諭內閣侍讀學士文碩奏敬陳管見一摺據稱步軍統領衙門妄拿舉人古銘猷一案崇禮與容貴文秀
處分及技勇兵和清等罪名均請另行核議古香臣仍應飭拿到案鄧承修以原參之人不候刑部結案
違例越參請交部議處等語此次因步軍統領衙門妄拿無辜是以從嚴懲辦前經大學士刑部會同審

明具奏並聲明古香臣緝獲另結業已降旨分別辦理崇禮等處分於該部奏上時亦經特旨加恩酌法
準情權衡至當若以欽定事件率請另行核議尙復成何政體所奏著不准行步軍統領等衙門查拿案
犯自有舊章仍當認真飭緝不得因此案藉口稍形懈弛鄧承修不候結案率行潰奏原屬冒昧惟所奏
尙非失實與架詞逞辯者不同文碩所奏均著毋庸議又據文碩奏陳寶琛前參崇禮及張樹聲摺內立
言均失體要請旨訓飭並御史卬積誠奏文碩糾彈葉陸昉語多誣陷請旨申儆一摺方今言路宏開原
期集思廣益裨補闕失在廷臣工果能確有所見切實敷陳誠堪嘉納卽或措詞間有過當而忠讜出於
至誠亦不加之責備若竟懷挾私意妄逞鋒鏑甚至阿附同類傾軋異己設有此等惡習亦難逃朝廷洞
鑒我朝綱紀肅清斷不容開門戶黨援之漸嗣後建言諸臣其各精白乃心屏除私見用副虛懷采納至
意○溫紹棠奏我朝家法列聖相承無日不視朝勤政接見臣工講求治理原以通上下之情集論
思之益事無壅隔政無廢弛法至善也同治初年仰賴皇太后垂簾聽政逐日召對臣工孜孜求治用
能削平大難再造寶區中興之功震鐸千古追我皇上御極以來稟承慈訓兢兢業業而安仰窺皇太
后憂勞兢業仍復日慎一日此固薄海臣民所共聞共見者也自近年聖躬違和樞臣遂不能逐日進
見用人行政積數日始一裁決在諸臣以爲頤養冲和萬不可以庶政之繁重勞宵旰然臣竊恐日

久弊生機務卽有叢脞之處更慮左右近習得以揣摩窺測於其間則流弊將有不可勝言者且政治之勤惰尤屬觀瞻所繫況我皇上典學方新凡一切訂護憲典及接見廷臣疆吏諸大端必得皇太后每日每事於垂簾時剴切訓示啟發宸聰庶於聖德始有裨益且使大小臣工知皇太后聖躬新愈仍復不辭勞勩勵精圖治弗輟於崇朝則執事者孰敢不感奮震恐爭相策勵各盡爾職以冀同襄盛治乎臣非不知大安甫報不宜過瘁然臣究願皇太后懲前代倦勤之失懷萬幾無曠之心力疾視朝逐日訓勉樞臣勤求上理則郅治愈隆凡海隅蒼生萬邦黎獻莫不同深鼓舞矣上諭翰林院侍讀溫紹棠奏時局多艱懇皇太后勵精勤政一摺慈禧端佑康頤昭豫莊誠皇太后聖躬雖報大安惟違和日久精神一切尙未能康復如常現仍日進醫藥藉資調攝而宵旰憂勞無時或釋上年軍機大臣等曾經面奉懿旨遇有緊要事件雖不召見之日亦令隨時請對年餘以來萬幾無曠悉秉訓諭施行朕方籲懇聖慈節勞頤養若卽照常視事朕心更抱不安此萬不得已之苦衷爲天下臣民所共諒溫紹棠備員講幄豈獨不知所奏殊屬冒昧著旨申飭○丁寶楨奏黔省獨山荔波等州縣向爲川鹽銷引之地近因粵商恃衆走私引銷疲滯經臣咨請示禁在案旋准貴州撫臣林肇元咨稱准廣西撫臣慶裕咨開查兩廣鹽法志開載西懷各埠廣西桂林柳州慶遠思恩泗城平樂梧州潯州南寧太

平鎮安等府屬州縣貴州黎平府屬古州在開泰縣境內兼銷永從獨山荔波地方謹按黎平府古州係新闢苗疆向無額引雍正十年前撫金鉉奏銷委官運鹽至古州永從丙妹三角里各地試銷乾隆三年前督鄂爾泰奏請招商定額引四萬設古州總埠而以丙妹永從三角里隸焉八年雲貴督臣張廣泗咨准黔之荔波縣隸粵西慶遠府原食粵鹽今改隸黔省粵鹽不至川鹽價昂民苦淡食今古州聽該處苗民自赴買銷以上達古州兼銷之永從獨山荔波共六十驛州縣均歸西櫃等語今准來咨黔省荔波獨山等處卽爲川鹽引銷之地核與兩廣鹽法志載永從獨山荔波均歸西櫃之條未符查粵鹽頻年滯銷稅課缺額正在招商設法整頓行鹽之際引地實爲餉課攸關未可稍涉歧誤咨請核辦等因當經轉行去後茲據黔省官運總局道員唐炯鹽茶道樞詳查兩廣鹽法轉運都疆界門內載自謹按黎平府古州係新闢苗疆起至聽該處苗民自赴買銷止均與來咨所引相符惟原文並無以上達古州兼銷之永從獨山荔波共六十驛州縣均歸西櫃二十四字又查粵鹽行銷各省運道總圖內只列黎平古州並無獨山荔波又就前雲貴督臣張廣泗原奏而論亦祇稱運至古州聽荔波苗民自赴買銷並非令粵商運往獨山售銷況部頒鹽引章程內及廣西撫臣金鉉原奏亦明有自爲川鹽引地之語此獨山荔波從前實爲川鹽引地之確證也如謂兩廣鹽法志係乾隆年間所修以後或有變通則宜以最後之案爲斷

四川於道光三十年經前督臣徐澤醇奏請委員帶商赴黔將引鹽引岸逐一清盤分疆畫界以杜爭執
造冊送部覆准通飭遵照重刊引根引紙明載獨山荔波在內有案可稽此又獨山荔波現在實爲川鹽
引地之確證也至三角惠本係獨山州一隅之地兩廣鹽法志內雖有隸古阜一語不得以一隅而概一
州並牽及荔波亦爲粵鹽引地今如禁止川商不令販鹽赴獨與川省鹽法大有關係不但僅失獨荔引
岸等語詳請奏咨前來臣覆查無異相應請旨飭下廣西撫臣查照原奏嚴禁粵商恃眾走私據塞獨
山荔波川鹽引地俾清界限以肅鹽綱庶商人不致疑畏引岸不致混淆實於川鹽官運兩有裨益得
旨著戶部查明咨行四川總督廣西巡撫按照奏章辦理○丁巳賜頭品頂戴輔國將軍載瀾長子名溥
倬○調耀年爲正藍旗滿洲副都統以成志爲鑲黃旗蒙古副都統○寶璽等奏四月二十日奉 上諭
侍郎錫珍奏請派大員整頓八旗學校一摺著吏部會同國子監妥議具奏欽此○等查八旗官學隸於
國子監衙門選入旗子弟在學考試讀書有助教教習督課之有祭酒司業稽查之立法既周成材亦眾
如果奉行勿替本毋庸改絃更張乃日久弊生有名無實學會傾圮教習備員生徒假冒誠有如該侍郎
所云者當茲時局需材官學近隸膠庠八旗半屬勸裔允宜加意培植以宏 聖教而育英才惟臣等深
究官學廢弛之由學會傾圮由於庫款支絀修理無資而教習應得銀幣學生應得膏火亦俱減成折廢

以至因貧廢業日卽荒蕪歷任監臣非不欲設法整頓而軍務甫平司農仰屋率視爲不急之務而量之
今工程愈煩經營不易欲事事取給於庫帑財力仍屬難支是原奏所云興工作籌款項用人員議章程
四條尤以籌款爲第一要義款項不集則學會不能議修俸餼不能議益學會不修俸餼不益則教習不
能應官學生不能應課教習不應官學生不應課卽速行加派大員專管學務亦難行不養之教而爲無
米之炊是非因時制宜仍屬空言無補也夫作事在謀其始而立法貴得其通該侍郎原奏謂官學虛名
僅存轉不如私設義學之得收實效然則欲除官學之積弊亦惟有俯採義學之成規務令事事從實而
已誠使厚集款項酌增館廩修學會則平估其價管學務則慎舉其人以急公無私之心收會稽謀新之
效積弊雖久整理非難臣等公同詳酌該侍郎所云一切學務專員經理者乃規模既定以後之事所云
一切規模悉心策議者乃學務未定以前之事將籌良法以謀其成宜 簡重臣以經其始擬請先行
特派滿漢大臣數員經營整頓八旗官學事宜將集款用人修工定章四條 飭令會同監臣詳細定議
請 旨施行必令費足濟工人足應務有合於原奏盡除積弊力破浮文之意將來規模大備所有官學
事宜或派員專理或派員會同監臣協理應卽由此次 欽派之大臣秉公保薦疏請 簡派其文職旗
員概歸考試一節亦應由該大臣等斟酌情形歸入章程具奏再候 命下臣等覆核定議 上諭吏部

國子監奏會議整頓八旗官學請飭派大員詳議規模一摺八旗官學廢弛已久此次籌議整頓事同倡始所有一切事宜應如何設法變通妥籌辦理之處著派寶鋆李鴻藻徐桐麟書會同國子監堂官體察情形悉心酌核妥議具奏○謙禧等奏卷查口外旗羣空閑官荒牧廠早經奸民私墾日甚一日游牧地方多爲蠶食然阡陌相連既成熟地而呈報升科終多隱匿曾經前任都統祥亨奏請飭由直督督撫各派委員會同查勘辦理計畝抽收押荒以裕國課而杜私佔嗣經直隸總督派委口北道奎斌帶同印委各員會同奴才衙門派出委員前往查辦在事年餘查清之地已收押荒定限升科均經前直隸督臣李鴻章奏奉諭旨知道了此外游牧地方有無已墾之地即著謙禧查明知會該督辦理嗣後劃清界限不准私相放墾以符定制欽此奴才等欽遵之下當即派員分赴旗羣復行履勘去後旋據該委員稟報所有前經查清地畝近多越種詢之佃戶民人愈云領有執照及促其呈驗而一味支吾並無呈出者甚至提傳不到無從究查等情並據旗羣各總管等詳稱本屬游牧界內亦有越界私墾情事奴才伏維口外官荒牧廠既經直督派委各員會同奴才衙門委員履查年餘據報地界已查押荒已交並無有礙游牧何以至今尚有越墾情事推原其故是各該委員實未能查清辦理草率含混所致故該佃戶民人等恃口外游牧平原遼闊殊少界限乘隙偷墾已成慣習現經奴才衙門委員往查第佃戶均係民人呼

應較屬不靈若非該管地方官有所攝制斷難勘辦奴才等再四思維惟有仰懇 天恩飭下直隸總督仍派前經查辦地畝之口北道奎斌前往口外督同印委地方各官並奴才衙門前派委員認真勘丈確切查明分清界限深淺墾新墾偷種之地無礙游牧者令其補交押荒實係有礙游牧者未便開墾庶期蒙民各守本業而免日後別生事端再應會同該二廳查勘未交押荒之察哈爾右翼四旗官荒牧廠前經咨商督撫委員會勘雖於去冬各派委員齊集豐鎮因冰雪在地未能查丈各回省旗奴才等現又派員早經前往查辦惟督撫迄今尚未派員會勘辦理相應請 飭山西巡撫作速派員前赴豐寧二廳會同奴才衙門派出委員妥為勘辦一切事宜請照直省章程辦理以歸畫一得 旨清查地畝自應分清界限惟不得稍涉紛擾著即知照張樹聲張之洞分別派員妥為辦理○戊午諭軍機大臣等金順等奏索倫營右翼四旗地方請飭會紀澤與俄國商議得還一摺據索倫營右翼四旗舊制分設霍爾果斯河之西新定約章歸入俄界現據總管該營古爾敏勒等游懇將該四處地方收回俾官兵不致失所等語伊犁分定界址前經該京卿與俄人再三集議苦心協商始克議定約章此時欲圖改易誠恐辦理為難惟據索倫營總管所稱各節該處官兵欲歸不得且恐被回民平毀墳墓實屬可憫究竟已定之界稍為變通能否設法商辦之處著即詳細酌議具奏原摺著鈔給閱看將此諭令知之○己未予故署

四川提督唐友耕照軍營立功後病故例從優議卹並附祀前四川提督古奉專祠○以京報紳耆四川提督○庚申諭奕謨等奏拿獲黃夜闖入闕左門人犯請旨交部嚴訊一摺禁門重地該犯曹冰仁膽敢於黃夜闖入不服盤問實屬藐法已極曹冰仁著交刑部嚴訊治罪○諭御史俊文奏大員意存專擅營員含混公事一摺據稱本月初三日正黃旗正紅旗護軍營領餉並未先期知會回平時刻是日未刻赴正紅旗護軍衙門詢問何時回平該護軍營領等皆以西戌之間因告以先到正黃旗護軍營俟事畢再到該營回平乃於戌刻回至正紅旗護軍衙門見兵餉已放詢及何以不候回平據云係該護軍營領與該堂官商放等語該營兵餉因何不候查營御史回平輒行散放著案布多爾扎布明白回奏○廣傳因病奏請開缺不允予假兩月調理○予直隸節孝貞烈婦女沈邵氏等七百三十五人旌表○張緒楷奏民爲邦本 國有常刑明刑所以弼教非徒崇尚刑名也溯自軍興以來兵燹遺黎凋亡殆盡迄今底定近二十年元氣未復正宜休養生息以培本根無如捐例頓開軍功輩出半皆負墨嚴酷之徒久不知撫字爲何事而爲大吏者耳濡目染方且以武健爲幹員以刻苛爲能吏至使任意妄爲毫無忌憚一切審訊案件創立非刑有以布紙黏貼人身向日隴乾帶肉揭起片片血淋名曰剝皮有以榛荆縛置人背使芒鐵刺逐條拔出根根透骨名曰抽筋有以錘敲脛應聲粉碎有以炭炙膚鼎與脛聞又製有好漢橫好

漢簡站枷站籠等具種種奇異不可枚舉無非故作威福殘虐爲快洵屬蜂虻其心豺狼成性矣夫三木之下何求不得似此傷心慘目有求死惟恐不速者夫亦何供之不招何案之不認乎即使罪無可追而明正典刑自彰 國法肆行陵虐奚用憲章所以金陵三牌樓一案前此卽以刑求河南呼冤一獄鎮平縣馬嘉卽用蚊烟燒炙熬毒背痕宛然雖冤與不冤尚未據該撫等覆奏而當時之定讞固以刑成也他如各省之濫刑斃命見於奏報者不一而足其餘之隱忍就死無所控告冤獄不知凡幾矣民豈無良遭此慘毒古聖王刑期無刑禹有下單之泣湯有解網之化曾子曰得情勿喜具見忠厚之意漢時崇尚循吏召父有稱杜母有頌德化所及自有人不敢欺人不能欺者果能忠信明決何難片言折獄卽使法昭明允亦自案無遁飾況我 朝 聖 聖相承律有減緩之條時行 赦宥之典 深仁厚澤二百餘年又時以水旱偏災動關 宸廑豈容此殘酷之吏陵削民生應請 旨飭下各直省督撫督同臬司嚴諭各州縣及問刑衙門申明定例遵用常刑總宜虛衷研鞠勿草率以圖功勿顛預以從事期在無縱無枉以成信讞除常刑之外一切非刑永遠禁革倘有仍蹈故轍別經發覺除將該員嚴懲外并將各督撫臬司分別議處是在各大吏慎選賢良使爲民牧訪有著名酷吏卽行撤參以仰副我 皇上軫念民依明慎用刑之至意 上諭通政使司副使張緒楷奏酷吏非刑虐民請飭嚴禁一摺各直省州縣及問刑衙

門審訊案件不准擅用非刑例禁禁嚴若如該副使所奏近來各省風氣多以武健苛刻為能創立各種非刑任意殘虐殊堪痛恨著各直省督撫督同臬司嚴諭各州縣及問刑衙門申明定例一切非刑永遠禁革以重民命○辛酉賞福建耆紳已革雲南巡撫林鴻年三品卿銜○壬戌諭前因御史倭父奏正紅旗護軍營領餉不候回平先行散放當令索布多爾扎布明白回奏茲據奏稱本月初三日該營應發餉銀時已戌刻是以未經等候察營御史到營照常散放等語該護軍營支發兵餉並未先期知會該御史到署回平殊屬不合索布多爾扎布著交部察議該護軍參領等均著查取職名一併察議嗣後應放兵餉著先期知會察營御史回平以昭核實○癸亥諭軍機大臣等有人奏劣員招搖納賄有損勳臣聲望請旨飭查一摺據稱兩江營務處道員王詩正知縣柳葆元狎妓浪游權勢熏灼賄賂公行又有遊客道員張自牧知府郭慶藩內外串通招搖撞騙捏報商名請引漁利等語著彭玉麟確切查明據實參奏無稍徇隱原摺著鈔給閱看將此諭令知之○甲子諭順天府奏京察保薦一等之治中請與各部院郎中員外郎一併簡用一摺著吏部議奏○繼格丁憂解任以錫珍署倉場侍郎桂全兼署吏部右侍郎耀年兼署戶部右侍郎○調敬信為工部左侍郎師曾為兵部左侍郎○乙丑諭張之洞奏拿辦口外棍徒等語據稱代州棍徒劉廷邦由監生捐納遊擊銜在歸化城等處開設糧店專以買空賣空為事並勾串各

衙門丁胥架訟誣累商民實爲地方之害劉廷邦著革去職銜並著兵部查明如另有保案卽行斥革交張之洞嚴審懲辦以靖刁風○內寅諭戶部奏稽查雲南銅運各員期滿請旨更換一摺雲南辦運銅斤頭二三起及四起頭批業已到京四起二批現據咨報起程此後續辦銅斤次第運解前派沿途經理各員期滿該部查照例案將經過之廣西廣東江蘇直隸等藩臬開列名單請旨更換廣西著派徐延旭廣東著派姚觀元江蘇著派譚鈞培直隸著派崧駿卽責成各該員嚴飭各道府沿途地方文武員弁認真稽查催趲護送前進如有無故逗留及盜竄短少等弊詳報該督撫嚴行參辦沿途應需水師照料之處卽由派出之員詳咨前途督撫及水師提督調遣仍著自奉旨之日起以三年爲限均責成此次所派之員一體經理遇有升調事故卽責令接任之員遵辦期滿再行更換○丁卯諭徐用儀奏遵查專案工程請旨辦理一摺所有 孝陵 陵寢門內及 隆恩殿內應修牆垣工程著派本年承修另案工程之大臣瑞聯祁世長敬謹承修○諭裕祿奏安徽潛山等州縣猝發蛟水趕籌賑撫陳士杰奏浙江金衢嚴等府屬猝遭水患籌款撫恤各一摺該兩省突遇水災小民蕩析離居覽奏殊深憫惻現在業經該撫等提撥銀米趕籌賑濟惟災區既廣且重亟應認真撫恤以甦民困著裕祿陳士杰迅將一切應辦賑撫事宜妥籌辦理務使實惠均沾毋任一夫失所動用款項准其作正開銷安徽浙江兩省同時猝遇水災情形

甚重爲近垂察之事 上天示警恐懼深我君臣亟宜交相儆惕遇災修省以消沴戾而重民生○
戊辰陳士杰奏護送琉球國遺風商民臣平氏等由閩回國報聞○己巳以章華署兵部左侍郎○釋發
遣福建已革前墨爾根城副都統吉爾洪額回籍養親○諭彭祖賢奏請將虧短錢糧之已故員弁查抄
備抵一摺湖北已故安陸縣知縣何錫儼前在任內虧短正雜各款銀七千五百三十二兩零已故蕪州衛守
備王鴻猷前在任內虧短屯餉蘆課軍安幫津等款銀六千二百四十七兩零前經奏參勒繳迄今逾限
已久分釐未解竇屬延玩著江蘇巡撫將該故員等家產一律查抄備抵以重庫款○諭許應騷奏援案
請派員接修工程一摺所有 東陵東朝房等工著改派上年承修專案工程之大臣瑞聯敬謹承修○
岑毓英奏據善後局司道沈保靖等詳稱臺灣各營防勇前經臣等奏請易大營爲小營共裁二千餘人
又將餘軍撤回一千餘人並將內地防勇奏撤五營均爲節用起見惟內地防勇尙存十五營請再酌量
裁併以節餉需等情 臣與督臣何璟暨司道悉心商酌現在內地之勇猶可酌裁查駐臺防軍因時值盛
夏水土不服且 臣現奉 命署理雲貴督篆若留防軍在臺仍屬未宜擬將防軍及帶兵各員弁全數遣
撤交記名提督何秀林記名總兵丁槐等帶回貴州歸伍將內地防勇抽撥三營前往更換於臺防亦不
致疏虞報聞○庚午諭譚廉等奏司員於應收祭品有意刁難請旨革職一摺 惠陵禮部員外郎裕謙

於陵寢應用祭品經盛京委員兩次送交並不查收輒以來文月分外誤藉詞刁難迫溥廉等飭令驗收仍復抗辯不服實屬荒謬裕謙著卽行革職○癸酉張之洞奏營民好種罌粟最盛者二十餘縣州縣其餘多少不尋幾於無縣無之曠土傷農以致畝無栖糧家無儲粟丁戊奇荒其禍實中於此然而覆轍相沿不知迷復議者或持不宜禁之說大率一由見小一由畏難然臣謂以地以時有不可不禁者四皆地瘠瘠產糧無多早年本恃外省接濟自爲罌粟所奪蓋藏益空卽如前此大祿垣曲產煙最多絀斃亦最衆近日種煙之利以交城爲最盛而糧價亦以交城爲最昂賊民害稼確有明證此時若再不過其流設有偏災豈堪設想此必禁者一也晉省山農多水利少種植罌粟之功倍於蔬卉偶有山溪水涸可資灌溉悉以歸之罌粟此物最耗地力數年之後更種他數亦且不蓄僅有此區區難得之水利而棄此毒民之物此必禁者二也晉省吸煙之癖官吏士民弁胥役以及婦人女子雖皆沾染大率鄉僻居其十之六城市居其十之八人人冠戴家疊起怠惰頹廢毫無朝氣在官者不修其職食力者不勤其業循此不已貧者益貧弱者益弱數十年後晉其危乎惟種之多者故吸之便此必禁者三也洋藥稅爲海關大宗今日方釐重徵藉禁外販以爲坊民正俗之謀若內地不禁聽其蕃滋何以關連人之口此必禁者四也查晉省罌粟之所以不能禁者一由於上官之禁弛不一朝令夕更一由於官吏之視爲利源圖收

畝稅祛此二弊必有成效可觀臣愚以爲禁之有方行之有漸先膏腴而後磽确先腹地而後邊疆責之於鄉保毋徒付之於吏胥過之於播種之先毋徒毀之於揚華之後力禁苛擾釐定考成感民以誠未有不勵雖不能遽絕根株而少一畦之惡粟卽多一口之餘糧矣至於官生將卒臣已多方勸戒現仿李鴻章天津所設之戒煙局延醫購藥以冀廣起沉痾屬官中有嗜好廢事分別撤任停委勒限戒斷許令自新并勇勒限戒斷不悛者汰黜學校諸生由學臣隨時董戒冀以漸摩觀感徐收移風易俗之功又奏晉省州縣虐民之政不在賦斂而在差徭所謂差徭者非傷民力也乃斂民財也向來積習每縣所派差錢大縣制錢五六萬緡小縣亦萬緡至數千緡不等按糧攤派官吏朋分衝途州縣則設立庫櫃追集四鄉牲畜拘留過客車馬或長川抽收或臨時勒價一騾月斂一百一車勒索數千以致外省腳戶不願入晉外縣車騾不願入省遠近行旅目爲畏途疾首痛心非一日矣西南路州縣差徭經閩敬銘減數定章民紓而官亦不困特貪吏無厭雖保不日久復萌故臣嚴飭西南路州縣恪守閩敬銘成規不容稍軼每月收支錢數一面榜示差局一面將原榜照錄詳送備查然而行省所治以及附省數百里內外縱橫四達大驛衝途差累未除怨咨未解大抵中路之陽曲東路之平定州並所屬孟縣壽陽西南路之靈石南路之榆次北路之忻州皆爲最衝冠蓋交午或車轎騾驢拉扣勒索或小甲差班無票橫擾或城鄉設局任

意難收居者行者均受其患前撫臣亦嘗有意籌辦無如官吏既不捐利又不任勞膜視民艱枝梧不辦臣堅持定見甘爲怨府陽曲資成陽曲縣知縣錫良平定靈石派知府馬玉瑤榆次派朔州知州姚官成忻州派代州直隸州知州俞廉三分投前往察度核議各就情形多方調劑現已定章舉行一洗苛政陽曲則爲籌款生息官設差官自養車驛如必不敷臨期自行僱備並飭將驛馬買補展定應差章程不准差員濫支總之不取民間一錢不撓過客一車平定驛陽朔理亦同止縣令其津貼上下兩站代爲接遞自四月以來陽曲平定孟縣壽陽等處未出一拉車扣驛之案靈石則將官署應酬洋費痛加裁省令其買補驛馬自支差務永除車棚之弊爲靈石本縣民間歲省差費制錢二千餘串兼爲鄰境汾西等縣民間歲省幫貼差費銀四百餘兩榆次差錢三次核減爲民間歲省制錢七千串忻州將舊日四鄉總局南北車局弊章釐正革除冗費爲民間歲省制錢一萬串爲行旅歲省制錢一千餘串目前衆情欣欣任職絡繹南北商旅四鄉車畜度恆霑而趨井門者聯鑣接軫漸有坦蕩之樂以上五路乃通省差務最繁疲之區今已一律廓清此外支郡下邑如有積累未除者卽當以次推行隨時整飭茲懇 聖恩明降 諭旨所有本省及外省經過管境之文武員弁兵勇需用車馬務遵定例不得例外騷擾如有額外需索臣當據實奏劾則有驛州縣不致受累而民困可以永蘇夫輕其徭者所以不奪民之事而勸其盡力於南

畝也薄其斂者所以不竭民之財而督其併力於正供也此臣所以爲民計而不僅爲民計者也至於官
署用物里甲支應詞訟實粟魚肉富民是皆省近年之惡習藉名興工修志按畝捐派是皆省災後之貢
風並已嚴檄禁革不許稍滋民累又奏省徵收向無魚鱗冊過割不清輾轉移易或耕無糧之地或納
無地之糧祖孫相承莫窮原本州縣催徵但知責之戶頭里長弱者撲賣包賠黠者隱匿飛灑於是有戶
倒累里甲倒累里之害加以小民惜稅契之費常有百年恆產但執白約並無紅契災荒以後迷亂益多
倘不窮源核實而貿貿然榜管戶甲嚴急催科凋瘵窮黎更無生理此一事爲督民之大害今欲去之斷
非清丈不可昔賢如宋之朱子明之海瑞呂坤 國朝名儒陸世威皆汲汲以清丈爲言夫豈得已徵之
目前督事商崇基行之於介休而效馬丕瑤行之於解州而益效以故解州亦係被災極重之區而至今
一無累糧且無荒地成效昭然現據曲沃縣紳民呈稱清丈已飭該縣認真舉辦此外如陽曲縣則因圈
糧爲累復有缺額錢糧數千金太谷亦有累糧數千金由官賠墊汾陽孝義皆民間自願清丈因經費未
集尚未開辦臣當督率司牧因地制宜籌款辦理惟丈地必先查糧查糧必先查契方不至有隱田缺賦
之虞若清丈之先明示糧戶令將所有契據概行呈驗登簿鈐印免其此次稅契之費宥其從前漏稅之
愆並須與民相約取足賦額而止設有圭撤盈溢之地亦不增糧則一縣之契自然歡呼雲集一縣之地

自然纖悉無遺魚鱗之冊咄嗟可辦然後再行清丈執契求田必無短絀訪之習於督省吏事民情者所言皆同查督省州縣田房稅契每歲徵不過百餘金至數百金仰懇逾格 天恩此後督省州縣何處能辦清丈者由省委員勸明舉辦於清丈開辦之年暫免一年田房稅契計一年所辦不過數縣其於歲入所減不過毫毛而小民踴躍從事田賦可以澈底澄清資糧於地不必求賦於人所損於上者甚細而所益於下者甚宏此亦培養元氣之一助也又奏外省臬司道府直隸州等官辦公每患不足廉俸扣減益形支絀不得不仰給屬吏其歲時餽送向有三節兩壽季規到任禮程儀諸目各省皆同山西亦然大吏之講求吏治者知其足以累州縣而又無以處司道府州於是乎別籌間款明定公費使上無匱乏下無挾制故近年各省邊 旨議定公費之案屢見奏章然其款必有所出如三江閩蜀諸省或取之釐錢或取之漕折或取之鹽平倘別無可籌亦必量加裁減然後著爲定數凡以意在恤下而已自光緒六年王定安任冀甯道時懲於督省官吏之貧窘日規禮不能尅期如數因慈惠葆亨巧立裁汰陋規之空名改立公費以便其私舊日止送水禮者一律改爲實銀並妄稱裁去一二三成臆混飾奏州縣由此重困人人嗟怨物議沸騰臣抵晉後案考其實則皆明減暗增甚至自無而有自少而多原奏所謂核減三成者僅止兩縣其餘僅減一成半成而合以加平加色較前數實爲過之且向來致送規禮每年五六次

之中必短欠二三次不等至水禮一項厚薄有間辭受無恆即使收納不過數色今則化私爲官轉紐爲廉公然委員專提公費於領款坐扣以致歸綏道屬向無節餉陋規者藉口新章一律添收橫徵巧取敗壞官常莫此爲甚矣除督省苛政首將原議臣衙門公費一萬九千五百五十兩供支桌飯六千四百兩暨此外一應查庫門包等陋規全行裁禁旋將通省公費就光緒六年原定數目體察情形分別裁汰臬道府州所收公費除河東道全裁外其餘酌量核減其著名瘠苦原有解送公費者如永和蒲縣大寧平魯吉州汾西和順榆社寧鄉寧武偏關沁源屯留沁水靜樂五寨天鎮五台右玉定襄左雲霍邱廣靈岢嵐鳳縣等二十五州縣全行裁免著名瘠苦原無解送公費者如石樓應州山陰垣曲平陸等五州縣中明永禁口外各屬新增解送公費者如歸化城綏遠城薩拉齊清水河托克托城和林格爾等六屬仍行裁革其餘舊有解送公費尙非瘠區者六十四屬州縣概行減半惟各屬中如雁平道暨朔寧平汾潞五府遼沁隰三直隸州或地居瘠苦或刪減較多不能不量予補苴卽於臣衙門所裁各費之內酌提津貼綜計裁汰之數除津貼各屬外爲兩司各道歲省銀六千二百一十一兩爲各府直隸州同知通判歲省銀一萬四千五百六十九兩爲州縣歲省銀五萬八千一百三十七兩通計爲四省屬官歲省銀七萬八千九百一十六兩皆省餽送上司水禮之風亦爲巨害實與節壽無異送時開票持票折錢優缺每

年五六次統計所值撫藩兩衙門釐者二三千金約者一二千金以下衙門遞減有差廉者不收收者率留其半一年所費亦復不資今一併廢申屬禁刊印章程以本年四月爲始通飭遵行臣平心審核此次所定固一本於損上益下之義然實亦足敷辦公絕無強人以所難之事此後倘有於裁減之外橫索取巧者當卽劾治其罪 上諭張之洞奏督省治理刊做現辦次第整飭請將未墾荒地寬限起徵並豁除累糧裁減差徭禁種罌粟裁革公費饋送各摺片覽奏具見實心爲民潔己率屬深堪嘉尚山西積弊相沿吏治日紊又當災祲之後民困未蘇亟宜興利除弊整頓紀綱俾地方日有起色該撫抵任未久將該省情形詳細體察切實籌辦卽著悉心次第經理以肅吏治而厚民生現在該省未墾荒地尙多間閭困苦著照所請自實在開墾之日起限三年後起徵用示體恤其實係已墾者仍著責成地方官認真稽查依限起徵該撫現擬豁除累糧籌辦清丈何處開辦著暫免該處一年田房契稅以資集事苛派差徭最爲地方之累所有陽曲等州縣五路差徭業經該撫分別裁革釐止嗣後經過文武員弁兵勇需用車馬務遵定例不得稍涉騷擾倘敢額外需索卽著張之洞據實參奏民間栽種罌粟有妨嘉穀屢經嚴諭申禁仍著該撫隨時查察有犯必懲以挽頹俗至該省裁汰陋規改立公費據張之洞查明實係明減暗增貽害州縣已將巡撫衙門新改公費及一切陋規全行裁革復將通省公費酌量裁減並禁止餽送水禮

創著飭屬一體遵行倘敢仍蹈前轍卽行重治其罪以懲貪劣另片奏已革山西布政使葆亨前在藩司及護理巡撫任內玩視民瘼虛糜庫款貽累屬吏前與甯道王定安創立款目支用浮濫葆亨一切弊端大半王定安播弄請旨懲辦等語山西迭遭大祲地方大吏應如何潔清自矢加意撫綏於庫款則擇要開支於賑款則核實動用以期實惠及民培養元氣乃葆亨王定安貪黷營私貽誤善後種種荒謬實堪痛恨葆亨業經革職著發往軍臺効力贖罪王定安著卽行革職一併發往軍臺効力贖罪其辦理善後諸務扶同弊混之候補直隸州知州陳本藩革職驅逐回籍候補知府安頤於局款不能細加清釐實屬疎忽著交部議處○張之洞奏臣甫入晉境既問民間之疾苦因問官之疾苦則歎以攤捐爲累對攤捐凡關係一省公事用度而例不能銷則科之於州縣者也晉省自乾嘉以來州縣解交兩司暨本管府州之攤款通計需銀十一二萬兩節經前撫王成格鮑源深曾國荃先後議裁議抵時有增減至今尙存常年攤捐十七款一平好銀不敷餉部飯部費等項一潞緇不敷例價盤費一慶桑絹不敷例價盤費一毛頭紙不敷運腳盤費一京餉津貼差費一科場經費一歲科考棚經費一兵部科飯食臬司兵部奏銷印紅飯食一秋審經費一臬書飯食一省城臬府縣三監經費一土鹽公用一各府州縣科考經費一交代經費通計約銀十萬兩實爲官場第一鉅累大率上缺所攤一千餘亦數百金州縣無從取辦或移甲

就乙賄虧正供或剋肉補創苟且稱貸即使批解如額固已力盡筋疲亦惟有私徵勒派受賄竊獄以取償於百姓臣以爲欲清胥吏治必先盡去攤捐之累使州縣之利寬然有餘而後下不至以脫削者累民上不至以虧挪者累國胥省地瘠民貧卽所謂脂膏之區本已遠遜他省廉俸減扣以來辦公竭蹶益以攤捐之累於是自拔者少而自愛者益稀且交代轆轤多因攤捐常有官隔六七任案懸十餘年而誦算咨催糾纏不已致令官斯土者率皆愀然有遺責牽掛之憂而毫無潔身奉職之樂此不特有妨澄叙之方恐亦非 盛明熙皞之世所宜有也數月來督飭兩司以上各官通籌詳議決除此弊使可刪者徑行刪汰可節者極力撙節必不可刪必不能節者就本省籌撥開款抵補現已籌定辦法通飭舉行專設一局辦理裁抵攤捐以清吏治之源名曰清源局惟平好鐵一端事重而款鉅難以全籌綱緝五項目繁而累深卽使代爲籌款而仍有糾紛淹滯之苦謹另片奏明請 旨辦理如蒙 俞允則六項之費可以變通從省其不足者仍由本省籌撥尙可勉爲管省牧令苛累一清無可藉口察吏之令可以必行惠民之政可以下逮矣抑 更有進者攤捐欠解不能參追往往急需已至而本款不來惟有於司庫移款墊付遇有參故極累之員欠者終欠則藩司又取他款以掩補之夫攤捐待用之款不能暫停而攤捐應解之銀十欠其五然則司庫年年挪墊無慮數萬金皆是何物窮其所歸不侵耗正款而不止其始則病官

吏其終則害庫儲此亦無形之漏卮也。臣察晉省歷屆清查報銷各底案正雜各款皆易尋求獨至攤捐一項煩瑣纏繞交代之推宕司庫之撥抵輾轉核算新舊牽纏大約奸胥作弊之窟穴捐吏取巧之伎倆盡在其中將此舊攤劃盡一一披辭於庫款交代均有裨益下戶部議奏。○甲戌以新修京師金臺書院成徵兩省各書局書籍。○諭戶部奏請派員監收奉天官莊糧石開單呈覽一摺著派崇綺會同寶森監收戶部所開清單未將盛京將軍銜名列入實屬疏忽戶部堂官及承辦司員著交部分別議處。○諭前據張樹聲等奏查明昌平州明陵附近民地並非私墾礙難一概封禁並矜民呈控誠端需索各節當令戶部議奏茲據奏稱此項地畝既據張樹聲等查明各地戶均領有契紙議糧升科並無私墾朦混影射情弊自應准其變通辦理著直隸總督順天府尹責成霸昌道督飭昌平州知州按照戶部此次議定界限章程辦理界限以內墾種之地一律騰出封禁以資保護如再有私墾情事即將該知州嚴行參處餘著照所議辦理另片奏誠端屢向州民勒交私租任意訛索並自行革充陵戶收地取租及以他人侵種等詞瀆奏殊屬不合請旨議處等語誠端著交部議處。○乙亥直隸良鄉縣驛站新建皇華館成。○諭前因福建職婦林戴氏以伊子林文明被殺冤抑屢次京控並該氏之姪林文鳳以伊父林翼國等均被羅織等詞赴都察院呈訴迭經降旨令該省督撫研訊確情迅速奏結茲據何璟等查訊取結分別議擬

具奏此案林文明以在籍副將恃勢橫行其勒贖田產強佔婦女各節均已查有確據此外被控殺死人命之案不一而足被拿時並敢率黨拒捕傷斃勇丁種種兇惡罪不容誅業經正法實屬毫無寬抑據奏現據林朝棟呈遞親供聲稱林戴氏情願斷恩認其林文驚京控一案係因痛親情切所致現已訊明林文驚亦願恩認等語即著照該督等所擬完結○內子江蘇地震○丁丑諭兵部奏遵議統兵大員處分一摺寶古塔副都統德平阿著照部議降三級調用不准抵銷○諭通政司參議嵩溥奏參劣員盤踞鎭營請飭查辦一摺據稱內務府造辦處郎中英綬圖謀差務賈婪無厭任用家人勾結官役冒領浮銷等語著該管堂官將該員承辦差務逐款清查如有前項情弊即行參奏○諭通政使司參議嵩溥奏參吏把持庫務請飭查辦一摺據稱戶部銀庫書吏史恩濬朱貴卿私立公所每於解餉委員到東苛派規費收發餉項任意勒索等語書吏史恩濬等前據御史英俊奏參經靈桂等查明奏結此次嵩溥所參各節是否屬實著管理三庫事務大臣確查究辦○諭李文敏奏江西玉山等縣被水分別撫恤一摺本年五月間江西玉山上饒廣豐德興都昌鄱陽湖口浮梁德安建昌等縣山水暴發衝決田廬淹斃人口甚多並德化彭澤餘干樂平進賢鉛山弋陽貴溪等縣亦同時被水覽奏殊深憫惻被災較重各州縣業由各該府縣分籌賑濟即著李文敏督飭認真撫恤毋任一夫失所用副軫念災黎至意○諭張樹聲奏知

縣開報差徭不實據實參劾一摺直隸安平縣知縣劉垂陔於奏飭開報差徭確數膽敢添報差車至四十餘輛之多迨改按原數派辦復較舊章加派京錢四百餘千實屬不恤民艱藐視功令劉垂陔著即行革職以示懲儆○陳士杰奏准刑部咨議覆御史胡隆洵奏請將盜案仍照舊例分別首從辦理一摺部以欲復情有可原舊例莫若將就地正法章程先行停止請旨飭下各省體察地方情形將夥眾持械強劫案件仍照成例解由該管上司覆勘分別題奏不得先行正法迅速妥議具奏等因素有依議欽此欽遵咨行到浙當經檄飭臬司體察妥議去後茲據該司孫家穀核議具詳前來臣查浙省兵燹以後各屬捕獲盜犯向於解府覆訊後遵照咸豐三年諭旨即行就地正法迨同治十三年刑部咨行議覆御史鄧慶麟奏軍務肅清省分拿獲盜匪請照舊制辦理經前撫臣楊昌濬議請將江洋大盜及教匪首匪情重土匪並例載大項兇盜各項仍於覆訊後解由該管道府覆審明確錄供通稟批飭就地正法免其解省審勘尋常盜案人犯均照向例分別解勘以符定制等因奏准遵行在案近年以來辦理更為審慎雖係情重兇盜但核其情節稍有可疑無不飭令解省由各上司覆勘具奏用防殘殺而重民命光緒六年刑部行令按距省遠近分別就地正法解省勘題當以浙省前奏定章已屬嚴密若但區別遠近轉不足以昭慎重是以未議更張夫為政首在安良而安良必先除暴殲匪兇盜實為強暴之尤若不嚴

連懲辦無以遏亂萌而懾匪膽浙省杭嘉湖三屬界連蘇皖匪游勇出沒不常甯台溫三屬山海奧區
漏匪稽誅伏莽未淨此外各府或地處通衢或民俗犷悍搶劫殺人之案所在多有盜風未能全息重典
似難遽停如必概歸舊制一律解省勘審則州縣距省程途遠者居多該犯等皆狡悍性成明知有千重
辟不特在途在獄均有疏脫之虞卽抵省後恃無質證狡供避就必須發回覆審而顯戮久稽匪黨之懾
懼無由事主之痛忿莫釋更恐或有意外轉致貽害地方如上年臨海獄囚被劫及慈谿監犯越獄皆其
明證也臣與臬司再三審度計近年浙省盜案照例辦理者爲多就地正法者有限僅就情重之案酌量
嚴辦係屬寬猛相兼並行不悖應請仍循同治十三年奏案以洋盜兇盜游勇土匪各項由地方官審解
該管道府覆訊明確錄供稟報核其情罪確當者批飭就地正法按季彙案具奏惟當慎益加慎庶幾刑
期無刑此外尋常搶劫案犯悉照成例辦理以示區別而免枉濫一俟土匪肅清盜風止息卽行奏請規
復舊制下刑部知之○陳士杰奏續准刑部咨議覆御史陳啟泰等奏盜案就地正法章程請飭停止各
摺公同酌議除各省實係土匪馬賊會匪游勇案情重大並形同叛逆之犯均暫准就地正法仍隨時具
奏備錄供招咨部查核外其餘尋常盜案現已解勘具題者仍令照例解勘未經解勘者統予一年一律
規復舊制辦理倘實係距省爲遠地方長途恐有疏虞酌照秋審事例將人犯解赴該管巡道訊明詳由

督撫分別題奏不准援就地正法章程先行處決以重憲典而防寬濫等因光緒八年四月初二日具奏
本日奉 旨依議欽此相應鈔單行文查照等因前來臣查此次部議核與浙省現辦情形不甚懸殊除
行司通飭各屬遵照以後悉遵部議章程辦理外謹附片陳明得 旨覽○戊寅以王文韶兼署禮部右
侍郎○以容山爲甯古塔副都統○賞魁福副都統銜作爲古城領隊大臣○諭李鴻章朝鮮內亂情形
危急日本已有兵船前往著卽起程馳赴天津部署水陸各軍前往查辦以期無誤機宜○諭志和奏酌
擬整頓咸安宮官學事宜並籌事府少詹事寶昌等奏會籌整頓章程各一摺著該部議奏○諭涂宗瀛
奏請將虧短交代已故各員勒限嚴追一摺湖南已故同知蔡履清知縣曹震東王國賓劉如玉陳時瀚
李煒前於正署各任內虧短正雜等款爲數甚鉅各該故員家屬均不守候交代輒行回籍久經咨催迄
未清理殊屬玩延著湖廣四川江西廣西湖北各省督撫正紅旗漢軍都統飭屬嚴追各該故員家屬勒
限三箇月將欠款掃數完繳倘逾限不完或完不足數卽行查封家產備抵以重庫款○文緒等奏前因
江省練軍各隊排演鳥鎗並無教習不成陣隊曾經奏調奉天教習由天津調撥洋鎗洋礮以便汰弱留
強實力訓練何城練習何隊若干再行奏明辦理欽奉 諭旨允准業已分咨奉天直隸各將軍督臣欽
遵酌撥辦理在案查江省籌備邊防始擬常練馬步兵丹一萬名因部議撥餉三十萬兩行令就餉酌減

隨經前任將軍定安酌擬馬隊一千名步隊九千名爲兩班輪演每兩箇月一換似於不減兵數之中仍寓以不減而減之意誠爲節省經費一時之權宜嗣因馬隊換班餒餒勤惰不齊改爲常川訓練而各城步隊仍舊輪班操演終未成行所以奴才文緒前有請改常川操演擴鎗青龍陣省隊復又改練長勝礮之議令調教習前來教練各項陣隊技藝若不另行變通仍照前議間斷習練無論如何督飭催勤而於兩月之間口號步伐萬難熟悉則又換班歸農散置追到接班原學既不甚熟廢棄似必茫然何須從頭教起心既不專藝何能精奴才等再四籌商兵貴精而不貴多練藝尤須練心欲求一律精強勢非常川訓練專精一志不可齊部撥練餉三十萬原是練隊五千自應就餉常川訓練以收實效擬將省隊練軍馬隊一千仍舊常川操演外所有各城練軍步隊請汰弱留強精加簡選四千名改爲常川訓練以收歷久精強不怠之效惟各城情形不同自應因地制宜辦理查呼蘭與吉省接界馬賊時擾不能不藉練軍以資巡防而追緝截剿必需馬隊擬將該處步隊練軍中改添馬隊三百名計共練軍馬隊一千三百名步隊三千七百名通共馬步五千名按所有各城輕重情形分撥酌定練軍數目編成隊伍應俟所調洋鎗礮位並教習員升到齊卽行起練惟馬隊步隊各有營制江省練軍步隊通按馬隊營制帶隊官太多擬請查照奉天步隊營制統領自帶一營以下各官應撤者撤應節省者節省以之統練五千馬步隊核

計約省銀三萬餘兩連次奏請減造火藥節省銀八千餘兩共節省銀三萬八千餘兩所有製造開花礮車鞍套等物成拉車馬匹乾銀教習口分擬即咨請奉省章程查照辦理其呼蘭改練馬隊應購馬三百匹連鞍轡馬乾以及將來安插鄂倫春添官建署應用一切餉稽核之原撥練餉三十萬兩尙敷足用毋庸另行添籌則諸事皆歸實濟以期兩有裨益如蒙 俞允奴才等卽飭委協領大員會同各城副都統總管認真精簡以昭核實從之○己卯諭安徽候補道高崇基著發往山西交張之洞差遣委用○辛巳張樹聲等奏 張樹聲承准恭親王醇親王咨開光緒八年五月二十七日具奏永定河上游河工據報載役繪圖呈 覽並請將出力官弁兵勇 飭交直隸總督從優擬獎一摺本日欽奉 懿旨依議圖留覽欽此咨行欽遵辦理前來遵查接管卷內上年大學士兩江督臣左宗棠奏令湘軍興修順直水利並隨時親往勘籌前大學士直隸督臣李鴻章當以涿州永濟橋河工咨商經左宗棠飭前福建布政使王德榜營務處道員王詩正督率湘軍於四月間抵涿州旋卽勘定各工將永濟橋北至永東村河中淤沙挑去六里餘堆於兩岸如長堤式接開橋南小減河里許修築北面斜堤並開濬涵洞加培永濟橋至胡良橋驛道七月初六日完竣又於七月底興工加築北岸三合土斜堤百丈高與橋齊闊七月十三日竣事當由李鴻章籌撥銀兩稿賞弁勇與左宗棠會委涿州知州查光泰等驗收據報河流順軌堤身堅實

農田驛路均可無虞左宗棠又飭土德榜率軍赴永定河上源山峽中周歷相度卽用火藥就地轟取石塊興建下尾店丁家灘等五處渠壩委員冒沅同往督工飭王詩正率軍赴永定河下游承挑經李鴻章飭該河道游智開等勘定下游自南八工上汛三號起至大蘆廠止向東斜開新河一道與南首舊河並行免致趨重南堤於兩岸出土平銷酌留缺口以消盛漲統計原續估工長八千三百餘丈合土四十一萬九千餘方湘軍分挑十二萬五千方淮軍分挑二十九萬四千餘方王詩正於八月二十九日督軍興作因須相隨左宗棠南下曉夜趕辦十月初一日完竣案由左宗棠節次分晰奏報並蒙醇親王親往丁家灘一帶查勘工作認真情形奏請 皇太后慈鑒其時淮軍尙有另項工程未及兼顧今正月杪解凍後經李鴻章奏明飭記名提督劉盛休記名總兵黃金志各率隊伍馳赴工次分段興作派營務處道員萬國順記名提督吳殿元佐理於原分二十九萬四千餘方之外加挑土三萬五千餘方三月初三四等日趕辦完竣李鴻章於去冬今春兩次派委游智開及前任天津道吳毓蘭驗收湘淮練各軍工程據報均屬相符並有寬濶過估之處其王德榜承辦上游左宗棠奏定之下尾店丁家灘西河灘野西河灘子村五處渠壩各工係上年八月二十五日興作又因紳民呈請添辦麻峪等村渠壩於今年四月初六日完竣據王德榜稟報做法丈尺計成殺水壩五道迎水壩十三道共長七百九十三丈五尺順水牆三道

共長二百五十七丈順水堤一道長九百二十丈石渠二道共長二百八十丈正渠支渠三十餘道迎水
東水涵洞石橋大道過路石橋二十餘道過水磴槽八道渠身腰閘三十餘道截上游之水使其灌淤民
地化沙磧爲膏腴分下游之勢可省挑濬中泓節勤勞爲安逸農民共慶行人稱便等情亦經李鴻章委
令游智開驗收臣樹聲接任後照案解撥銀兩犒賞弁勇旋據游智開稟報工程完整高寬丈尺悉符據
署西路同知石廣臣聲稱可引水灌淤地二三萬畝當飭石廣臣督同宛平縣印佐丈量分別生熟地將
有主者仍歸原業其無主荒地令附近居民墾種俟成田酌收租息以爲歲修之資並蒙恭親王醇親王
將已成工作繪圖貼說恭呈 慈覽在案除此項已竣工程及直隸歷年辦成各屬河道堤工由臣等督
飭該管各員認真修守此外應行修濬處所隨時察勘分別辦理外伏查湘軍自抵直以來先則合修涿
州永濟橋河道堤工繼復分赴永定河上下游修建渠壩挑挖河道統計工程甚巨在事各員均能實心
實力踴躍趨公歷時年餘之久雖值嚴寒酷暑猶復胼胝經營不稍休息洵屬異常出力卓著勤勞今已
一律告竣成效在人耳目竇末可泯自應欽遵此次 懿旨及上年十月十四日左宗棠奏奉 諭旨從
優請獎左宗棠前已將在事出力文武員弁名數獎敘預行開單咨送李鴻章轉交到臣樹聲茲謹照續
清單恭呈 御覽並將左宗棠原開及王德榜於工竣後開保協同出力之地方官紳酌核獎敘附列單

內仰懇 天恩俯准照擬給獎以昭激勸其藍領千總以下各弁並照左宗棠來單另行咨部註冊應給
六七品功牌之勇丁由臣樹聲按名發給下部議奏○壬午 上詣 壽皇殿行禮○甲申 上詣 太
廟行禮

東華續錄

光緒四十九

朱壽朋敬編

汪錫增恭校

秋七月乙酉諭張家口監督英文奏差滿回京虧短盈餘銀兩請減成賠繳一摺著戶部核議具奏○時享 太廟遣載敬恭代行禮○俗祥奏查明七年分奏銷案內未完一分以上各員職名並續完銀數下部議奏○俗祿奏安省被災州縣現辦賑撫情形並宣城等處續被水災緣由得 旨覽奏已悉先後被災州縣情形甚重小民蕩析離居深堪憫惻著即提撥鉅款督飭委員紳士分投賑卹毋稍遲誤並將一切應辦事宜實心經理以資拯救沿江圩堤務當實力保護仍隨時將辦理情形據實具奏○丙戌諭戶部奏遵議耀年所交右翼監督盈餘銀兩一摺所交盈餘銀兩十七兩零著交廣儲司耀年短收額內盈餘銀兩應得處分著加恩寬免○諭戶部奏遵議已故左翼監督熙拉布所交盈餘銀兩一摺所交盈餘銀兩一千二百六十一兩零著交廣儲司熙拉布短收盈餘銀兩應得處分著加恩寬免其應賠銀兩並著加恩免其賠繳○諭巡視東城御史阿彥泰等奏匪棍潛逃所遺房屋請旨辦理一摺倉匪張六即張鳳侯畏罪潛逃久未弋獲著步軍統領衙門順天府五城御史一體勒限嚴拿務獲送部究辦該犯所

遺房屋等項著戶部會同該城御史查收入官○陳士杰奏辦理紹興西江水災並借款修築石塘要工
報聞○己丑以文暉爲都察院左副都御史○獎安插耿馬土族出力官紳照昭鏡等○劉長佑奏停止
捐輸所有空白執照一律清盤嚴防假冒報聞○庚寅諭給事中樓譽奏浙江杭州等府同被水災請
飭速籌撫卹一摺前據陳士杰奏杭嘉湖各府屬雨水過多田禾被淹飭令該地方官確切履勘妥爲安
撫茲據該給事中奏稱本年五月下旬餘杭縣之苕溪水勢驟漲衝坍塘堤田廬被淹臨安於潛等縣均
發蛟水仁和錢塘二縣農田亦被浸灌湖州府屬之霅溪同時泛溢嘉興府屬之海塘決口多處以致各
州縣同被水患等語覽奏被災情形甚重殊堪軫惻著陳士杰迅速派員會同各該州縣勘明被災地方
妥籌撫恤分別辦理毋任失所用副軫念民艱至意○諭丁寶楨奏查明敘永廳等處被災情形分別酌
量撫恤等語本年夏間四川敘永涪州彭水奉節巫山綦江等處大雨冰雹河水陡漲衝沒田廬淹斃人
口並資州所屬地方不戒於火延燒民房二百餘戶覽奏實深憫惻業經該督委員會同各該地方官查
勘被災輕重分別籌款賑濟卽著督飭認真撫恤毋令一夫失所用副軫念災黎至意○諭丁寶楨奏參
劾知縣請旨革職等語四川什邡縣知縣張惟一徇縱差役不念民隱且於酌定差規一事故違功令幾
釀事端辦理愆局委員候補知縣徐世潢屢次舞弊追經追查竟敢抗置不理張惟一徐世潢均著卽行

革職以肅吏治○予捐助地方義舉新河縣已故監生高寬及孫高凌高迥旌獎○壬辰恆訓馮譽驥鴻英聯恩奏操練兵丁技藝漸就嫺熟藉可兼興文教擬援案變通將整屋縣西雅柏鎮瀕臨渭河一帶留牧廠地試辦開墾招佃取租提充書院經費得旨如所請行○甲午孫貽經奏八旗屯居童生來京報考向無文憑恐不免有朦混之弊請飭下八旗都統內務府三旗暨五旗包衣專管大臣明定章程妥議具奏著爲定例 上諭順天學政孫貽經奏考試八旗屯居童生請飭明定章程一摺著禮部議奏○允文緒奏請安插黑龍江私墾流民細丈升科○陳士杰奏護送琉球遭風難民報聞○乙未任道鎔奏黃水盛漲歷城等屬籌辦工撫情形得旨覽奏已悉卽著督飭印委各員勘明被災輕重情形分別工賑奏明辦理○以楊玉科捐建江寧官地鋪屋交部核獎○免天津海防儲軍馬礮隊各營採買戰馬關稅○裁吉林黑龍江交界卡倫二十六處專歸練隊巡緝○丙申諭御史謝謙亨奏閩省教官於歲科兩試新進童生勒索修贖威嚇凌辱各生補廩充貢選拔舉優均須議明規費並於諸生戶婚詞訟輒行羈押需索請飭查禁等語教官勒索規禮干預詞訟例禁甚嚴若如所奏殊屬不成事體著該督撫會同學政嚴行禁止此等積弊他省恐亦不免並著各直省督撫學政申明例禁加意訪查如有前項弊端卽將該教官嚴行參辦以肅功令○諭御史李盛錫奏大臣濫保人員請予申儆一摺已革山西冀寧道王定安

前經會國莖保薦擢用乃竟至貪黷營私種種荒謬該督保舉非人自有應得之咎會國莖著交部議處嗣後中外大臣務當懷遵迭次諭旨切實保舉不得徒採虛聲甚至徇私濫保致干咎戾用副朝廷延攬人才綜核名實至意○諭御史李鼎錫奏山東各州縣開徵糧票先由糧差領出該戶尚未交糧糧差輒爲代納事後加倍取價未獲所欲卽稟官追押恣其魚肉地方官庇役賣民以致胥役日橫等語錢糧爲維正之供豈容胥役藉端需索貽累閭閻著任道鎔嚴行查禁如有糧差代墊案費經該糧戶告發卽行懲辦地方官不得稍涉徇縱此等弊端他省恐亦不免並著各督撫一體查禁以懲蠹役而恤民生○戊戌左宗棠奏寧屬泰州等州縣興建倉頡祠工竣請加封號下禮部議奏○卹吐魯番古城陣亡員弁祥奎等○卹殉難濟木薩參將倭質○頒給馬蘭峪城外五神祠匾額○己亥 上詣 奉先殿 壽皇殿行禮○庚子諭誠端等奏瀝陳並無私收地租革退陵戶各情係知州宋文縱串役民朱藝等捏詞誣控請派員查究等語明陵附近開墾地畝各節前據張樹聲等查明具奏並准戶部議覆此次誠端所奏是否屬實著畢道遠周家楣確切查明據實具奏○辛丑 上詣 奉先殿 壽皇殿行禮○丁寶楨奏呈四川鹽法志署下戶部核議具奏○諭前據都察院奏浙江道員王隱樾以查荒被毆一案撫臣並未傳訊該道亦未輸服等詞赴該衙門呈訴當諭令陳士杰據實覆奏茲據奏稱前次業將莊書王陸沅等分

別問擬並將知府許瑞光等奏請交部察議當查辦時王蔭樞求見經該撫傳問開導該道面稱如此辦理亦其所願等語此案王蔭樞因公受辱已將官民等分別懲處究竟該道辦理亦涉操切業經奏結何得屢次指控著仍照陳士杰前奏所擬完結所請飭交閩浙總督再行查辦之處著毋庸議○諭奕謨等奏拿獲擅入闕左門人犯請交部治罪一摺禁城重地理宜嚴肅乃本月十六日夜間竟有人犯向萬軒在闕左門進東值房牆上行走實屬膽玩向萬軒著交刑部訊明從重治罪另片奏闕左門進東值房應由太常寺管理稽查等語著該衙門堂官查明辦理○頒給湖北黃陂縣城隍廟及太廟山神廟匾額○癸卯年朕奏治鹽惟在疏銷舊引積滯新引無可議增此理之一定不易者也兩江督臣左宗棠請復引岸始本受蔽於奸商既而仰體聖座會商核奪足見顧全大局之深心毫無膠執顧其事一發而難收所不能曲爲維持者勢也夫政戒紛更法宜明備與其頻年口舌紛紜殊有損國家政體何如及時折衷定論予勦臣以轉旋之策示商民以平準之經查楚岸原有應復引岸故眾口因而交爭此次新商請加楚引至十五萬之多究其實則現繳四成票費約六十萬金耳以楚岸舊商引價每季向合萬金之說比而計之僅可加引三萬誠照此數明定限制准楚岸新商三萬引之請則新引不至有患多之病揆之楚中銷數情形亦未必萬分窒礙厥後引岸如能漸復引額不妨遞增票有常價業可相安而善後

要需其得資挹注者益非淺鮮是一酌濟間而數善備焉矣如果新商以利微本重為嫌卽請勒令楚岸
舊商認捐六十萬金歸還新商撤銷新商引票准楚岸舊商領加三萬引既不至巨款無著亦以微權衡
之大公也至於皖岸辰岸等處本無未復引岸銷路何由擴充新加引票應盡撤銷現繳票費無幾儘可
發還以免新舊同困之虞臣伏思古人堅僻之強每以有激而成近日南來士大夫及都中留心時局諸
臣靡不講求至此臣諮度所及據實直陳仰懇 聖裁明斷 諭令左宗棠懷遵辦理並請 飭部著為
定章庶幾政令永肅實效徐收矣 上諭御史李膜奏准鹽增引而宜設法維持一摺著戶部議奏○予
提督宋慶之母劉氏旌表○衛榮光奏人材之興實乎學術而學術之盛賴乎儒師 國朝崇尚正學作
興宇內凡高材碩儒積學砥行足為士林矜式者一經臣工上請悉蒙 恩賜褒獎所以端學術勵人材
誠鉅典也茲有前詹事府左春坊左中允劉熙祚官居侍從曾值 內廷受累 朝之知過視學廣東自
引疾告歸後主講上海龍門書院計十四年師道卓然教澤甚著至光緒七年二月初三日在籍病故學
者惜之據江蘇紳士前陝西按察使王承基等暨龍門書院肄業舉貢生監臚陳事實請據情援案具奏
卽經批司查明詳辦去後茲據江甯布政使梁燾煌蘇州布政使譚鈞培覆核轉詳請奏前來臣查劉熙
載揚州府興化縣人少孤力學刻意以古人自期道光二十四年成進士供職翰林風裁峻絕一介不苟

欄食蔬羹敝衣徒步有人所不能堪者處之晏如研究諸經博觀子史於天文地理律呂音韻六書九數以及諸家方術靡不涉獵卒之由博返約粹然一出於正咸豐三年 召入上書房行走散秩供職三年如一日 文宗顯皇帝嘉之 御賜性靜情逸四字六年 京察一等以道府用旋因病乞歸前湖北巡撫臣胡林翼疏薦之稱其貞介絕俗學冠時人同治三年 召至京授國子監司業選左春坊左中允督學廣東勤於其職作懲忿窒欲選喜改過四箴示諸生曰士學聖賢當先從事於此逾年復引疾歸襆被如故不名一錢其上海之龍門書院者前江蘇臬司應寶時任蘇松太道時所創不課舉業教諸生讀書勵行期爲實學劉熙載既主講席以身爲教正而不迂寬而不弛日月有課出入有稽講員問答娓娓不倦說經不分漢宋論道必宗程朱隨才引掖多所成就吳越之士聞風來學前後著錄者數百人及其病歿諸生千里赴弔莫不哀慟其感人如此少壯所著書有轉輒六卷四音定切四卷說文雙璧二卷說文聲韻二卷昨非集四卷晚年刊華就實不事著述惟持志塾言二卷則自言所得以教子弟者語皆篤實切於日用跡其生平介潔之操固天下所共推而品學之端毫無瑕疵不愧純儒伏查前大理寺卿李聯琇主講江寧鍾山書院有年身故後經前督臣沈葆楨奏請宣付史館列入儒林傳奉 旨允准今該故中允教思覃敷聲望尤著可否仰懇 天恩俯准將左春坊左中允劉熙載生平學行事蹟宣付國史館

列入儒林傳以爲積學砥行者勸出自 聖裁 上諭衛榮光奏請將已故儒臣宣付史館一摺原任詹事府左春坊左中允劉熙載前在上書房行走曾任廣東學政旋因患病開缺主講上海龍門書院品學純粹以身爲教成就甚多洵足爲士林表率該故員學行事蹟著宣付國史館列入儒林傳以彰碩學○甲辰諭溥廉等奏庫存祭品虧短並自請從重治罪一摺本年五月間 裕陵純惠景惠妃園寢市經被竊乃本月查點祭品又復短少一十餘件之多該管大臣等所司何事實屬咎無可辭溥廉榮毓桂昂著交各該衙門嚴加議處其掌守人員及值班官兵著查明分別參辦並著順天府五城直隸總督各飭所屬將兩次賊犯一併勒限緝拿務獲嚴行懲辦○予天津縣孝子張淦劉士琨旌表○乙巳諭御史陳啟泰奏條陳興利除弊事宜一摺著各該衙門議奏○諭吏部奏遵議大員處分一摺前任山西巡撫現兩廣總督曾國荃應得降二級調用處分著加恩改爲革職留任○諭朕奉 慈禧端佑康頤昭豫莊誠皇太后懿旨兩月以來迭據各省奏報水災詳加披閱時切慮懷因思安徽浙江江西被災最重漂沒田廬淹斃人口之處甚多小民困苦情形尤屬可憫深宮焦念寢饋難安雖經各該撫籌款賑恤誠恐力難週及不能普濟災黎所有安徽浙江江西三省著戶部各撥銀六萬兩以資賑濟即將本年中秋節應進貢內款項撥抵應用無庸呈進猶恐由部發往緩不濟急即著由各該省應解京餉項下就近劃扣俾災民

得以早沾實惠其餘江蘇山東湖北四川福建陝西等省均有被災之處卽著各該省覓籌款項妥爲撫恤欽此各該督撫務當嚴飭所屬將所撥銀兩核實散放毋任一夫失所以副 皇太后節用推恩勤恤民隱至意○丙午何璟奏海山下游溪河驟被風水坍塌房屋撞壞船隻淹斃德國女孩派委查勘分別辦理得 旨覽奏殊堪憫惻卽著督飭卽委各員認真查勘妥籌撫恤毋任失所此外有無被災之處並著一體查明具奏○丁未劉錦棠奏等承准軍機大臣字寄光緒八年三月十七日奉 上諭譚鍾麟奏籌度新疆南路情形一摺所稱酌度七城廣狹籌簡設立丞倅牧令一員更於喀什噶爾阿克蘇兩處各設巡道一員如鎮道之例著劉錦棠體察情形會商該督妥議具奏等因欽此仰見 朝廷眷顧西陲勛規久遠之至意跪聆之餘莫名欽感伏念新疆當久亂積能之後今昔情形判若天壤所有邊疆一切事宜無論拘泥成法於時勢多不相宜且承平年間舊制亂後泐然無存萬難再圖規復欲爲一勞永逸之計固除增設郡縣別無良策種種情由經大學士前任陝甘督臣左宗棠迭次奏明有案仰蒙 聖明洞鑒准其因時制宜在事諸臣先後稟承 宸謨籌辦善後諸務罔敢稍涉疏懈現在地利日闢戶口日增各族漸知向化諸事均有成效郡縣之設時不可失茲奉 旨命臣等會商妥議久安長治之基實肇於此自當就愚慮所及熟籌審度以期妥協而垂永久謹按經野建官之道必量其地之民力物產足

以完納 國課又可供給官吏胥役而有餘然後視其形勢之衝偏繁簡設官以治之非從寬預爲計畫則官困而民必受其害故新疆添置郡縣設官未可過多此必然之勢也惟南路各城人民較多腴區較廣其轄境之最遼闊者縱橫至數千里少亦數百里若設官太少又慮鞭長莫及難資治理不足爲經久定制臣鍾麟原奏內有一城不過數十莊不及東南一小縣七城各設一官足矣等語經臣錦棠就近體察情形此說蓋亦不盡然又臣鍾麟原奏將吐魯番作爲南路城池因有七城設官之議臣錦棠查吐魯番現不在八城數內自吐魯番城以西喀喇沙爾庫車阿克蘇烏什是爲南路東四城葉爾羌喀喇沙爾英吉沙爾和闐是爲南路西四城應統八城通盤籌畫一律改設郡縣以上各節經臣錦棠臣鍾麟往復兩商意見相合公同酌議除自哈密南至吐魯番北境至精河應暫照臣鍾麟原奏無須另設多員外回疆東四城擬設巡道一員駐紮阿克蘇該道以守兼巡爲兵備道督飭所屬水利屯墾錢穀刑名事件撫馭蒙部彈壓布魯特稽查卡倫作爲衝煩疲三項要缺喀喇沙爾與土爾扈特和碩特游牧地方犬牙相錯每有交涉事件擬設直隸廳理事撫民同知一員治喀喇沙爾城庫車擬設直隸廳撫民同知一員治庫車城阿克蘇爲古溫宿國擬設溫宿直隸州知州一員治阿克蘇城拜城縣知縣一員治拜城歸溫宿直隸州管轄烏什緊鄰布魯特部落爲極邊衝要擬設直隸廳撫民同知一員治烏什城以上各廳州縣

應統歸東四城巡道管轄回疆西四城擬設巡道一員駐紮喀什噶爾回城該道以守兼巡爲兵備道管理通商事宜督飭所屬水利屯墾錢穀刑名諸務彈壓布魯特稽查卡倫作爲衝煩疲難諸有最要缺喀什噶爾爲古疏勒國擬設疏勒直隸州知州一員治漢城疏附縣知縣一員治回城疏勒直隸州管轄英吉沙爾緊鄰布魯特爲極邊衝要情形與烏什略同擬設直隸州撫協同知一員治英吉沙爾城葉爾羌爲古莎車國擬設莎車直隸州知州一員治漢城葉城縣知縣一員治回城圖莎車直隸州管轄葉爾羌所屬瑪喇巴什一城爲回疆東西咽喉要地積年河水爲患必須置員撫治擬設直隸州水利撫民通判一員治瑪喇巴什城和闐爲古于闐國擬設和闐直隸州知州一員治和闐城于闐縣知縣一員治哈拉哈什地方歸和闐直隸州管轄以上各屬州縣應統歸西四城巡道管轄凡茲建置大略較之光緒六年四月十八日左宗棠奏擬設立各官稍爲簡省較之臣鍾麟原奏七城各設一官之議略爲加增斟酌損益務適於中冀免流弊而成永圖至於佐雜人員應俟郡縣設定由道員及各承倅牧令就近察酌地方情形將其必不可少者詳請奏設其各屬州縣疆界應俟立官畫分後再行奏咨各處地方暫時責成諸軍統領營官督率營勇駐防俟兵制議定再行奏請設立總兵副將參遊都守千把等官其餘未盡事宜統候陸續籌議隨時奏請 睿裁又奏新疆各城向設阿奇木伯克等員其職銜有三四品者現議

建甌郡縣擬設丞牧令各員官階既非甚崇若回官仍循舊章殊有枝大於本之嫌似宜量爲變通以歸妥善郡縣設定後擬將回官各缺暨阿奇木伯克等名目概行裁去各屬州縣另行酌設頭目額數略如各省辦公紳士不可以官目之過有缺額卽行就地選舉出具切實考語詳由該管道轉請邊疆大臣發給委牌惟須照回官向例撥給地畝作爲辦公薪資免滋需索侵吞諸弊又南路總回恩儒者居其大半彼教中所謂條勒阿渾往往捏造邪說肆其誘惑之術人心易爲搖惑禍亂每由此起總回語言文字本與滿漢不同遇有訟獄徵收各事件官民隔閡不通阿奇木伯克通事人等得以從中舞弊是非被以文教無由除彼錮習自全疆戡定以來各城分設義塾令回童讀書識字學習華語其中亦多聰穎可造之資授之以經輒能背誦學寫楷書居然端好爲之講解義理亦頗能領會足見秉教之良無分中外雖不必侈言化民成俗而其效已有可觀此時建甌南路郡縣教職等官暫可不設惟宜設法鼓勵使回族子弟奮於學庶教化可期漸興所有原設各塾應由各屬州縣延師訓課以小學孝經論語孟子大學中庸詩經易經春秋教各回童擬每歲合各屬州縣考試一次有能誦習一經熟讀華語者不拘人數多寡卽送該管道衙門覆試詳由邊疆大臣援照保舉武弁之例咨部給予生監頂戴待其年已長大卽准充當頭目如有勤學不倦能多習一經或數經者無論已未充當頭目均准各屬州縣考送由道覆試請獎再

行遞換五品以下各項頂戴仍不得逾六品以示限制惟曾任三四五品阿奇木伯克者裁缺後仍應准其照舊戴用翎頂充當頭目其各項頂戴頭目人等如果承辦差使異常出力仍隨時酌量保奏懇恩賞給三四五品頂戴用昭激勸又奏查光緒六年大學士前陝甘督臣左宗棠奏稱將來議設行省必以哈密劉錦新鄧形勢始合哈密及鎮迪道所屬文武地方均應歸劉錦棠統轄所有升調補署考核及一切興革事宜均可就近辦理分別奏咨陝甘總督無庸兼管等因光緒六年十一月初四日奉 上諭左宗棠奏請將哈密鎮迪道歸劉錦棠統轄等語等因欽此欽遵在案伏念新疆改設行省之議左宗棠實始發之查本年三月十六日陝甘督臣譚鍾麟奏籌度新疆南路情形摺內亦有設立行省當從州縣辦起然後遞設督撫以統轄之等語蓋新疆本秦隴之屏障燕晉之藩籬亟宜經營盡善以固吾圉然舊制既不可復自不得不另籌善策左宗棠譚鍾麟所議改設行省固無非維持永久之謀至臣愚慮所及則與左宗棠等不能盡同有不容不及時陳明者臣自屢歲出關辦賊泊於今已歷七載熟度關外情形求所以長治久安之道固會設郡縣易舊制別鮮良圖此臣之所見與左宗棠等相同者也惟將新疆另為一省則臣頗以爲不然現在臣等擬設之南路各屬州縣合之哈密及鎮迪道等處原有各屬州縣總共不過三十餘處卽將來地方日益富庶所增亦必無多查光緒六年四月十八日左宗棠覆陳新疆宜

建行省開設郡縣摺內所載擬設及原有各屬臚州縣亦不過二三十處嘗考各省中郡縣之最少者莫如貴州廣西等處新疆則尙不能及其一半其難自成一省情形亦已明矣且新疆之與甘肅形同臂齒從前左宗棠以陝甘總督督辦新疆軍務凡籌兵籌餉以及製辦轉運諸務皆以關內爲根本其勢順故其事易舉臣之才力資望萬不逮左宗棠而自受代以來兩年之間雖無功過足錄然未至僨事者皆賴譚鍾麟楊昌濬諸薦公忠力顧全局故能勉力支持向使甘省大吏稍存畛域之見則邊事已不堪問若將關內外劃爲兩省以三十餘州縣孤懸絕域其勢難以自存且後路轉餉製械諸務必將與甘肅分門別戶以清眉目所需經費較目前必更浩繁其將何以爲繼故新疆甘肅勢難分爲兩省此臣之所見與左宗棠等不同者也又臣閱譚鍾麟原奏籌度新疆南路情形摺稿議將北路鎮迪等處暨擬設南路郡縣皆歸 欽差大臣統轄謹按 欽差大臣本非國家常設之官且哈密及鎮迪一道原係奉 旨暫歸徵臣統轄現既議設南路郡縣必須熟籌可久之道不得仍作權宜之計以郡縣設定後諸事須照各省辦法而言例章則臣營無舊案可稽用人則軍中無合例堪以補署之員至於錢糧刑名升遷調補諸事又無藩臬兩司可專責成似茲窒礙難行之處未可枚舉徵臣之愚擬請將哈密鎮迪道等處暨議設南路各臚州縣併歸甘肅爲一省惟歸甘督遙制竊恐鞭長莫及擬仿照江蘇建置大略添設甘肅巡撫

一員駐紮烏魯木齊管轄哈密以西南北兩路各道屬州縣並請 賞加兵部尚書銜俾得統轄全疆官兵督辦邊防並設甘肅關外等處地方布政使一員隨巡撫駐紮舊有鎮迪道擬請援照福建臺灣道之例 賞加按察使銜令其兼管全疆刑名驛傳事務改迪化直隸州知州爲迪化縣添設迪化府知府一員治迪化城管轄迪化昌吉綏來阜康奇台五縣似此辦理實較另爲一省稍免煩費而於新疆時事亦甚相宜如蒙 聖明准行仰懇 簡巡撫藩司及擬設之南路兩道員以便及早措置臺是現在伊犁既經收還分界亦不久可以竣事沿邊無警防務解嚴如設巡撫則 欽差大臣儘可裁撤臣擬俟巡撫西來當舉關外一切情形詳細告知並將經手事件交其接辦再行呈繳關防仍俟 臣足疾醫治全愈後卽當東裝北上以伸累載戀 闕之忱蓋新疆蕩平經六年之久此時事務日艱急宜定大局以修政理臣於吏治嚮少閱歷關外郡縣諸事宜多係創始斷非軍旅粗才所能了局區區愚悃實恐貽誤將來並非意存規避此不能不預先瀝陳者也又奏哈密以西各滿營旗丁亂後子遺僅存舊制萬難規復卽以古城烏魯木齊兩處言之前此古城領隊大臣勝安山京西來道出哈密與 臣談及古城滿營房屋久已鞠爲茂草該處旗丁總共不過十數人勝安山以補授斯缺原應卽行赴任究竟古城無隊可領無營署可住進退維谷殊形狼狽臣比屬其與金順恭銳熟商自處之道悵然踰天山北去 臣於光緒二年夏秋

之交率師克復烏魯木齊其時滿城傾圮瓦礫荒涼未見旗丁一人嗣臣進克南路各城始將旗丁之被
賊裹脅者陸續拔出咨送烏魯木齊安插然爲數亦屬無多故以恭錄之精明強幹世受國恩銳意欲
有所爲以圖報稱然所管旗丁只有此數雖都統有兼轄鎮迪道之責而政務亦甚簡少不足以發揮其
才氣他如哈密辦事臣明春所部健銳威儀各營已奏明全行裁撤其所轄回務亦經左宗棠奏准歸哈
密通判管理欽遵在案竊國家建官分職原各有分內應辦之事現在新疆時事變遷都統及辦事領隊
各大臣兵少事簡幾無異投閑置散此不但非朝廷設官之意亦諸臣心所不安也如蒙聖明體察
臣等准照擬設甘肅巡撫之議則烏魯木齊自須設立撫標官兵南北兩路均宜另設額兵添置總兵副
將參遊都守千把等官以爲永遠邊防之計烏魯木齊提督應移駐喀什噶爾城以扼要害吐魯番暨南
路皆有參贊辦事領隊各大臣員缺固可一律裁去卽自哈密北至伊犁所有都統暨辦事領隊各大臣
員缺亦宜酌量裁撤巴里坤古城烏魯木齊庫爾喀拉烏蘇等處所餘旗丁如目前之零星分布終恐無
濟實用不如併歸伊犁滿營生聚教訓以期漸成勁旅查承平時新疆南北兩路係歸伊犁將軍總統烏
魯木齊都統亦兼轄鎮迪一道如設巡撫不但鎮迪道無須都統兼轄卽將軍亦無庸總統全疆免致政
出多門巡撫事權不一其伊犁滿營似應改照各省駐防將軍營制從新整頓務求精實可用庶於邊防

有所裨益繼之新疆不復舊制使當概照行省辦法若二者並行則一切夾雜牽混之弊難以枚舉茲伊犁已還界務將竣大局急宜定奪臣恭摺 欽符既有所見不能不據實直陳是否可行祇候 睿斷張曜奏奴才接准伊犁將軍金順參贊大臣升泰咨開本年二月初四日伊犁業已接收從此保境息民請信修睦蠲飛蝗動咸獲少安此 堂陛之良圖邊庭之幸事也論者謂新疆局勢大定今日之先務在於裁汰勇丁以節餉項奴才則謂裁汰勇丁即可規復兵額變通營制方能永固邊防也營制之宜變通者有三曰增騎兵曰重火器曰設遊擊之師各省綠營定制步多騎少扼要防險戰於山谷步兵之利也出奇剿平原蕩決騎兵之利也新疆各城廣川大原固以戈壁減步增騎宜亟變通者一也軍興以來多向火器愈講愈精以他器敵火器則他器鈍而火器利以火器敵火器則舊者鈍而新者利少者鈍而多者利故外國水師非恃兵眾惟恃器精而又勤於習練減養兵之資為購器之費宜亟變通者二也至各城營汛設立制兵為數不能過多此城有警彼城設防各顧轄境力難分救故南北兩疆宜設遊擊之師居中駐紮統以知兵大員此項兵丁不供他役規模嚴整以期士氣常新設遇各城有事風馳電掣而赴之無事之歲南北兩疆各於邊界定期會哨振武揚威隱戢奸宄宜亟變通者三也所謂變通營制方能永固邊防也至於各城兵額督辦新疆軍務劉錦棠陳明請就關外現裁營勇選其精壯耐勞者編成制

兵改行餉爲坐糧實爲良策蓋關外營勇有籍隸陝甘者新疆較近風土相似者有雖籍隸東南各省幼被賊掠輾轉投營里居氏族不能自知者有原籍遺兵出廬已空親屬已盡不可復歸者有寇亂之日樹怨於鄉以異地爲樂土故里爲長途者此屬若選爲制兵久經戰陣可期其得力一利也參用屯田之法兵食兩足二利也關外多一精兵關內少一游勇隱弭無數事端三利也所謂裁汰勇丁即可規復兵額也邊城要地治兵爲先兵強則邊固邊固則民安民安則事理矣譚鍾麟奏新疆底定左宗棠請設行省蓋以維持久遠之策臣聞左宗棠原奏自督撫司道府廳州縣以及貳雜等官甚多不但目前建置城池衙署一切需用浩繁費無所出卽以後文武廉俸役食等項經久之費亦未易籌臣愚竊維目前辦理善後因革損益百廢待興而要以固結民心爲主卽設立行省亦當從州縣辦起如果地方日增庶富然後遞設督撫以統轄之其勢亦順而易查新疆北路山哈密以至精河中間鎮道所屬州縣各官均已復舊伊犁同知收復後卽可委員往署地曠人稀現有之官足資控制似無須另設多員惟南路八城僅吐魯番一同知闕展一巡檢其餘七城克復以後一切善後事宜如清丈地畝稽查戶口徵收稅釐皆委員辦理已經數年委員非盡不習第以空名辦實事時復更易既無責守亦無考成安得有與斯民相維繫之念夫纏回亦人也族類雖異要各有田園家室之戀其所以屢作不靖者勢迫之也聞未亂以前誅求

無厭正賦之外需索煩多大約官取其一阿奇木伯克等取其二官與民文字不通言語不同阿奇木伯克等從中播弄傳語恐嚇故往時續回視官如寇讐比來回民頗有能通漢語者誠得愷悌慈祥之吏安輯撫綏均其賦役正額外絲毫之以擾累民知官之愛己也自能上下相孚相安無事臣身受 重恩忝膺邊寄凡有關民生利弊為政纖默不敢請 特旨飭令劉錦棠體察南路七城情形分別地方廣狹煩簡設立承倅牧令等官一城不過數十莊不及東南一小縣七城各設一官足矣吏於喀什噶爾阿克蘇各設巡道一員如北路鎮迪之例皆歸 欽差大臣統轄庶地方有所責成民心有所繫屬其餘未盡事宜臣當隨時與劉錦棠互商辦理斷不敢稍分畛域 上諭劉錦棠譚鍾麟張曜奏請變通新疆官制營制各摺片著各該衙門速議具奏○諭軍機大臣等張樹聲奏吳長慶等統領官軍馳至朝鮮國都將李昞應獲致現已解送到津著暫行妥為安置俟李鴻章到津後會同張樹聲向李昞應究出該國變亂緣由及著名亂黨詳細具奏候旨遵行吳長慶現派隊伍圍攻在尊利泰兩村著飭令該提督穩慎進攻將亂黨渠首迅速捕除一面妥籌防範鎮定人心以安反側吳長慶所統各營不敷分布現已添調黃金志帶隊前往將來應否添調重兵著李鴻章隨時體察情形酌量辦理○諭御史陳啟泰奏太常寺卿周瑞清包攬雲南報銷經該省糧道崔尊慈永昌府知府潘英章來京匯兌銀兩賄託關說等語著派麟書潘

祖陸確切查明據實具奏○戊申左宗棠奏上 前奏楚皖各岸增復引額收繳票費另款儲備提撥接准
部覆淮南新加各票照現在奏銷期限能否按輪銷竣不致奪舊商之利以便新商應令該督通盤籌畫
再行奏明辦理此次究竟每票收費若干各商領票若干共收銀若干原奏並未聲敘無憑稽核等因
伏查新加引票均係就向來應復原額及向有專岸之處准添新票仍令新商一律挨輪行銷並非額外
增引自無新舊之別察看現在情形實無搶跌賤售之弊商情適然踴躍如故但期引地速復銷路暢通
則新舊商人同受其益而風謠亦自息矣至所收票費本年春間據商人賈全福等三十四商請增復楚
岸十五萬引商人伊厚堃等八商請增復皖岸四萬二千八百五十引商人厚德昌等三十六商請增復
淮北十六萬三千十八引商人怡同興等二商請增平江專岸二千引 臣體察商情稽考成案實係舊額
應復未復之引歷任應辦未辦之事而歷前任鹽官交章奏請禁川復淮規復舊額部 臣議奏謂禁川
復淮事屬復舊而非變法豈容以一時之利廢歷久之規又謂新商認捐每票數千兩舊商包餉每票不
過千兩數之多寡既殊新商每票數千之捐規期可集舊商每引二兩之餉按歲一輪時之遲速亦判但
就目前款項計之舍新謀舊已不免於失算等語 臣愚以為奏章部議昭昭在人耳目案卷具在此次辦
法本率由舊章以裕課便民為主凡出示行文及批發呈詞均由 臣一手料理曾不逾時一一鞫堪復按

而批發新商認捐各票又正值出省關稅之時丹次遞稟稟頭看批駁之衙署重門洞開尤覺毫無阻隔所批貨全福等五百引爲一票每票暫定票費銀一萬兩旋據以利徵求減遂批飭暫定爲五千先繳二千辦運一次察看獲利在二分以上則票費仍應加增倘獲利不及二分則票費任准酌減初次核定後始准循環轉運其餘三千兩限年內繳清以示限制公事官私合計與尋常官場套數不同商情之異常踴躍卽由於此而得商見新章漸定已有始心又因昔日每票一張可索價銀一萬數千兩者今不過數千兩卽可領獲一票舊票且無人過問又值臣整頓鹽務禁止夾帶重斤虛報淹消諸弊遂不遺餘力設法傾軋以致謠誣紛起湖南尤盛臣雖有所聞亦未便設法訊禁恐徒增擾累致傷政體皖岸定每引繳票費銀十六兩該商屢稟請減未許亦飭先繳五成餘均照實全福章程辦理至淮北引鹽地近獲利較微每引飭繳票費銀二兩卽循環轉運數月以來據實全福等繳庫平銀六十萬兩伊厚堃等繳庫平銀三十五萬七千一百六十兩平江專岸繳庫平銀八千兩均經臣札發江甯藩司儲庫聽候提撥惟該商等係陸續呈繳期票實全福現尙有期票貳萬兩未經兌銀伊厚堃亦有數萬兩係七月底限尙未經兌銀臣前因票費既未劃定而銀兩亦未到期繳清故無從明晰聲敘具奏惟德厚昌應繳庫平銀三十二萬六千三十六兩業經繳清已札發兩淮鹽運司遵照部章專咨報部存案俟將來提撥支用仍逐

一詳晰報部查核外其福慶祥等請楚岸衡永寶之引見離務尙無定章心存疑慮尙未繳銀應暫置勿論又商人盛世豐等八商請認湖南辰州專岸一萬二千引商人積善祥等請認湖南永綏苗疆專岸一千七百十二引或意存龍斷或延不繳捐均飭一併撤銷所有增足各岸引額收繳票費銀數目謹據實陳明下戶部議奏○己酉 上詣 壽皇殿行禮○予前文華殿大學士倭仁於河南省城建祠○辛亥諭御史譚承祖奏京師地面近來藉端滋事之人各分地段糾黨肆行設有嫌隙競相報復毫無忌憚請飭拿究等語肇釁重地豈容此等匪徒肆意擾害似此逞兇滋事恐不畏法殊堪痛恨著步軍統領衙門順天府五城御史一體訪拿從嚴懲辦以儆兇頑而安良善○壬子左宗棠奏 臣併案查閱江蘇營伍業將閱過江北各營及舉劾各員恭摺奏明奉 旨著照所請兵部知道欽此復於四月初十日將接閱江南各營起程日期奏明 臣於十一日抵鎮江閱鎮江營及毅字勇營十三日閱常州孟河江陰靖江四營十五日閱福山鎮標左右新兵營並調閱狼山鎮標陸汛等營十八日閱撫標左右蘇州城守平望新兵等營及親兵正前正副撫標親兵三營十九日閱撫標親兵水師營二十日閱太湖左右淞南淞北提右五營水操二十一日閱提中左前後右金山青村柘林等營及新兵二營並裏河五營陸操撫標親兵後營洋槍隊二十四日行抵吳淞口閱取達測海威靖澄慶靖連兵輪五號及龍驤虎威飛霆策電蚊子船

四號陣圖打靶並外海六營內洋五營水操總計江南水陸各營查閱一周臣卽於二十七日回署伏查江南各標營制兵未盡復額其散處塘汛者零星分布與江北各營情形相同而江北土瘠民貧人習勞苦風氣與武事爲近江南士著勇決強壯之氣稍覺不如幸各將領久經征戰閱歷已深平時督率校練極意求精伍籍中又多習時從征部曲以故所演陣式步伐行列大段可觀槍礮進退連環綿密無間水師弁丁取材外洋內海不乏其選提督李朝斌又勤於甄拔加意講求所統澄慶靖遠登瀛州馭遠各輪船蚊子船及艇船試演大礮打靶致遠命中緣機陡降趨捷殊常尤爲出色沿途閱視各處礮臺均尙扼要合式內如關山焦山象山係新授淮揚鎮總兵章合才所建地勢高下極爲合宜足資控扼吳淞口礮臺足壯形勢守臺兵勇均整齊足數緩急可恃華洋共贊之上海爲商旅輻輳之區繁盛如故調任九江鎮總兵朱淮森赴任所遺練兵五營臣檄飭記名提督易致中記名總兵栗龍山分統其眾統領新湘三營何明兆告假回籍臣檄飭隨營記名提督甘肅永昌營副將劉端冕接帶均駐金陵城外分守礮臺可期得力此查閱江南各營及順國兵輪礮臺之大概情形也所有此次舉劾各員謹繕具清單恭呈御覽仰懇 天恩分別照准以資激勵得 旨如所請行○予捐挑河工前署陽湖縣知縣吳壽康之母胡氏旌表○癸丑慶裕奏洪水積漲不消嚴守隄防遲開各壩以衛農田而保民命得 旨覽奏已悉仍

著督飭在工各員實力防護以保民田○麟書潘祖蔭奏光緒八年七月二十三日奉 上諭御史陳啟
奏奏太常寺卿周瑞清包攬雲南報銷經該省糧道崔煥麟永昌府知府潘英章來京匯兌銀兩賄託關
說等語著派麟書潘祖蔭確切查明據實具奏欽此遵卽密派弁兵先將順大祥乾盛亨匯兌局商人王
敬臣周時燦并鋪夥陳作霖帥大山車正穎侯府芳拿獲連起出帳簿一併送案等以案情重大當卽
遞派司員嚴加審訊據王敬臣供係雲南彌勒縣人來京在打磨廠開設順大祥匯兌莊生理光緒七年
秋間至八年春間伊鋪內山雲南省票局匯到銀兩經永昌府知府潘英章卽潘子成來京持票到鋪陸
續取用據周時燦供係山西平遙縣人在市帽胡同開設乾盛亨匯局餘供與王敬臣相同並據王敬臣
供稱雲南糧道崔煥麟亦在該鋪匯用銀兩請以所匯銀兩作何使用伊等暨供均不知情實之陳作霖
等供亦不知底細各等語等查核各供該御史陳啟泰所參崔煥麟等來京由票號匯兌銀兩一節係
屬實有其事據陳太常寺卿周瑞清包攬報銷係由雲南崔煥麟潘英章經手是所參周瑞清包攬一節
必待該二員到案始明現在該二員尚未到案若卽請 旨飭令周瑞清呈遞親供亦係一面之詞礙難
憑信自非將崔煥麟潘英章提傳研訊無從究出確情查據吏部片稱崔煥麟係光緒八年六月初十日
驗放二十二日給照請假回安徽原籍潘英章係七年十月十五日驗放十二月十五日給照等因核計

應限潘英章早應回省相應請 旨飭下雲貴總督雲南巡撫暨安徽巡撫飭令該二員迅速來京赴部
聽候質訊 上諭麟書潘祖蔭奏請飭提要証歸案審訊一節據情周瑞清被參包攬雲南報銷一案現
經嚴訊順大祥乾盛亨商人王敬臣閻時燦等據供潘英章在粵均曾在各該舖用銀兩請飭提訊
等語雲南糧儲道崔煥現任請假回籍永昌府知府潘英章業已回任著雲貴總督雲南巡撫安徽巡
撫飭令崔煥潘英章迅速赴部聽候質訊不准稍有延延太常寺卿周瑞清著聽候查辦毋庸在軍機
章京上行走○是月美利堅國新簡駐華使臣楊約翰抵任○英吉利國使臣威妥瑪回國參贊格維訥
署理○奧大利亞國使臣何福爾回國由德意志國使臣兼理使事

八月甲寅朔卞寶第奏湖南候補人員請再停分發一年下吏部議奏○准前工部侍郎呂賢基專祠列
入舒城縣祀典並以同知徐啟山等附祀○調張其光為浙江温州鎮總兵關鎮國為福建福寧鎮總兵
○乙卯鮑超奏奴才蒙 恩賞假三月回籍就醫遵卽泝江起程並將先期來鄂守候隨同赴任之眷屬
就便挈之西還不料五月二十七日行至東湖縣屬之加冠石灘上水鼓風狂將船折倒全舟之人皆落
江中當有僕人將奴才從水中掖出立於船底之上隨波漂流幸夔州府救生局委員候補知縣易光楚
派來接護之紅船首先趕到救過船中又有統帶宜昌水師總兵以撥紳所派救生紅船及巡江舢板望

見飛槳趕來又宜昌鎮總兵崔福泰以峽江危險亦派有弁兵就近護送該勇丁等皆奮力斃水將各屬等合力救起呼吸之間仰托 聖朝威福多獲生全而三子六子竟至閉入艙中救援不及其餘僕婦及水手等亦同時溺斃數名禍生倉猝慘痛非常當即派人沿灘打撈耽延多日始獲收殮停妥然後改由陸路取道建始一帶回川到籍已是七月初旬伏念奴才受 恩深重義當公而忘私何敢以祗領之愛上瀆 宸聰惟是頃刻風波二子同遭非命皆由德薄災生氣運乖蹇實難逃 國家重寄且驚悸之餘重以悲悼私衷抑鬱更覺傷病交增現在甫經到家假期又滿欲解爰則莫可排解欲療疾則急切難療自揣情形一時萬難遵 旨赴任惟有籲懇 聖慈俯加憐憫准予開缺俾得閉門靜養再圖報効將來不勝感激屏營之至 上諭鮑超奏假期將滿瀝陳下情籲請開缺一摺湖南提督鮑超著准其開缺調理○鮑超奏蜀江險灘甲於天下自夔州下達宜昌更覺危險異常為商船往來必由之路覆溺之愚不可勝言四川督臣丁寶楨曾身過其地目擊覆舟傷慘情形深為憫念故在山東巡撫任內即經捐廉一萬兩以六千交四川以四千交湖北商商各督撫臣製造救生紅船以資救拯四川則由督臣於候補州縣中遴委幹員二人分駐夔巫兩處設局經理如救人最多年滿酌予記功湖北督撫臣以統帶宜昌水師總兵賀楷紳老成持重令其就近在宜昌設局經理一併歸其統率分飭所部沿途妥為防護此次奴才

因風失事若非該紅船等合力救援則全舟之人皆不堪設想是紅船之關係實非淺鮮惟查大江西來
卽慶宜一帶險灘過多約計不下六十處現在慶宜兩局原設紅船僅十四號宜昌一局原設紅船僅十
五號共計二十九號似覺不敷分布且紅船一隻水船勇丁六人此外不過再容數人縱令每灘分設一
隻而峽中貨船每船人夫多至五六十人而灘兇水惡劇急非常遇有失事之時紛紛乞命一船往救既
有擁擠沈溺之虞次第相援又有顧此失彼之憾以故救起者少而溺斃者多奴才體察形勢凡著名險
灘非有紅船多隻萬不足以資拯救合無仰懇 天恩飭下川湖各督撫臣設法添補之處出自 高厚
鴻慈 上諭湖南提督鮑超奏四川慶州至湖北宜昌沿江一帶向有救生紅船惟險灘過多紅船尙少
遇有覆溺船隻救護不及情形甚慘請飭添設等語著湖廣總督四川總督湖北巡撫籌撥款項於著名
險灘處所酌量添設紅船並飭屬隨時認真救護以保行旅○丙辰命文煜馳驛前往 東陵查辦事件
○以周盛傳爲湖南提督丁汝昌爲直隸天津鎮總兵○諭軍機大臣等給事中鄧承脩奏朝鮮亂黨已
平球案未結宜乘此聲威特派知兵大臣駐紮烟臺相機調度厚集南北洋戰艦分撥出洋梭巡爲扼吭
拊背之謀其駐朝鮮水陸各軍暫緩撤回以爲犄角資日本以擅滅琉球肆行要挾之罪日人必有所懼
球案易於轉圜等語所奏不爲無見著李鴻章張樹聲酌度情形妥籌具奏○諭軍機大臣等精安額爾

慶額奏勘分科境邊界未敢冒昧從事等情繪圖呈覽請飭妥議一摺據稱現在分界若將新約內之奎
峒山及科爾之哈巴河等處分入俄界既失地利而蒙民等無地容身恐滋事端等語所奏自係實在情
形該處界務崇厚貽誤於前曾紀澤力爭於後既定新約祇可就原圖應行勘分之處力與指辨酌定新
界金順等務當懷遵六月二十一日諭旨詳慎商辦無庸另行交議至圖中黃綫以西蒙民哈夷約有若
干應如何擇地安插籌款撫卹之處並著清安額爾慶額會商金順升泰悉心妥籌具奏惟分界期迫一
時恐難就緒應由金順升泰知照俄國分界大臣呈議推展以期勘定之後彼此得以相安並由總理各
國事務衙門照會俄國使臣並知照曾紀澤轉咨商辦將此由五百里各諭令知之○丁巳諭刑部奏請
飭各省認真辦理秋審等語各省辦理秋審案件自應詳核情節分別實緩以期無枉無縱迭經降旨嚴
飭乃近來積習相沿竟將金刃傷多且重及情兇近故情同拒捕之案亦復格外從寬率行議緩本年經
該部由緩改實者較往年尤多無非藉於救生不救死之說並為規避失入處分起見殊非刑刑無刑之
道嗣後各省將軍督撫等於秋審各案定擬實緩務須悉心酌核認真辦理以持情法之平用副朝廷明
刑弼教至意將此通諭知之○戊午祭社稷壇命奕訢恭代行禮○准故揚州府知府何金壽事蹟
交國史館立傳○劉海鰲奏伏讀七月二十三日 上諭劉錦棠誦鍾麟張曜奏請變通新疆官制營

制各摺片著各該衙門速議具奏欽此仰見 皇上綏靖邊疆至意臣備員侍從玉門未出扼塞無由周知曷敢妄參末議惟通籌西域情形則郡縣未可遽設屯田可以專辦有不能不分緩急者請為 皇上濫陳之夫建非常之業者必有可因之勢有可乘之時有可為之力而功乃有成郡縣自秦始然春秋時夷於九縣楚稱葉縣封建浹化為郡縣秦因而設之相沿至今臺灣富庶之區沈葆楨請設臺北府居者甚少幾乎有城郭而無人民時勢不同也新疆地勢遼闊間以戈壁周迴二萬餘里版圖初入設險建城不過二十餘處每城不過數十莊百數莊亂離之後戶口益稀今欲舉一城百數十莊而養一州縣合二十餘城而成一省臣知其不能或者地廣人稀併歸甘肅既難遙制改設官制亦屬虛名則事方經始需費甚煩且庫儲支絀西餉歲近千萬力已難支又何能籌此鉅款以供經野設官之用此郡縣之未可遽設也至原奏屯田一法實因地制宜之上策新疆蕩平六年今始收復伊犁局勢大定惟營勇未可盡撤第營勇不撤餉亦難繼欲收兵食兩足之效則屯田尙為天山南北不少膏腴近聞西征士卒多有娶妻成家者授之以田其情正願導之為農其利自倍惟在實力奉行耳左宗棠譚鍾麟公忠體 國力顧大局劉錦棠張曜練習邊事規畫精詳非尋常將帥可比試辦屯田應有成效請 飭通籌專辦其營勇之精壯者酌留以備邊防餘皆計口分田各給籽糧使之自食其力易冰天雪窖之鄉為鋤雨犁雲之地成

熟之後緩數年以升科歲收租糧以供軍需每年可節餉銀數百萬兩又和闐古城火道溝塔爾巴哈臺等處產金產玉物力豐饒使經理得人通商惠工其財不可勝用兵化為農戍卒感生成之德養繼以教荒服消穢悍之風長治久安之道無踰於此屯田之可專辦也臣愚昧之見是否有當伏乞 皇太后

皇上聖鑒交部併原件會議施行 上諭翰林院編修劉海澂奏新疆善後事宜請權緩急一摺著該衙門歸入劉錦棠等摺片一併議奏○辛酉張之洞奏督省患貧至今日而極然非匱乏之患而弊混之患何也自咸豐軍興費廣用急紛紜牽補不為限斷以至於今數上距道光二十九年未經澈底清查者三十三年矣外困於供億之煩內困於墊款之鉅虧挪掩覆無有窮期藩吏以清雜為秘局有司以拖欠為得計若再不為之所譬如上填下漏雖休養數十年歲入數百萬無救於貧一由於軍需報銷之案歲月過陳一由於善後之案挪移過鉅一由於交代之案未結過多而三案之盈絀虛實則相為勾連隱互於其間三案不清遂生五弊一曰籌墊第一案軍需籌墊者十三萬搭於次案第二案軍需籌墊者五十萬搭於三案第三案軍需籌墊者四百三十三萬有奇懸宕至今其墊欠之主名正雜攤捐兵差生息無一不有即如歲底造送軍機處戶部常年藩庫實存冊尚列舊管實存銀一百五十萬大率皆窮屢道光以來正雜各款之尾數凡已用未銷確係有著者例報實存夫案庫儲之籍則曰實存多金檢軍需之

案則反曰籌墊巨款忽忽糾矛盾已極難辦諸款大率類是竊思既係部核准銷之案若當日報銷時即爲指撥清楚豈不徑直分明今擬檢核司冊查對部案凡在核准數內軍需例得動用者即將所借之款各就本款開支毋庸虛立墊欠名目徒多撥還文案其有本款現須應用或本款墊撥軍需又借他項以供本款之用必須帳轉歸還勢難開除者分別簡明確數從容籌還如此則應賠箇省眉目分明雖欲侵挪無從影射故以劃清籌墊爲第一義一日濫支查辦墊諸款中當日因係實在動用屢經詳核然歷年久遠有此項可就現款支持陳款無須歸還者有前案早已渺茫欠款無人承領者葆亨在任時於此等款項放手濫發縱容家丁書吏承領者按成朋分倒扣三七二八糜費無算今雖類波不能復迴而覆轍不可不鑒擬即確切查核如有此類卽予勾除不准再行歸還庶免以有限之正供飽無涯之羣竊故以刪除濫支爲第二義一日撥抵凡州縣墊辦兵差核准未發者則本員以抵解款溯查咸豐之季同治之初軍需旁午供項浩繁且其時上司執法苛務謹嚴屬吏風尚亦多扃牾賠累誠所不免近年巧僞萌生開報已難深問甚至本員兵差長餘用之不盡並可借與他人賄售得價於是州縣欠解寶銀化爲空帳從此人人覬覦交代誰肯清完徒爲藩署丁胥之利藪病國長奸莫此爲甚查從前已經撥抵結案者不可勝數礙難追究今日所請多已嚴飭司局速將兵差墊款已抵未抵確數查清截止除本員

外不准再行借抵俾州縣不致效尤故虧故挪故以禁止撥抵爲第三義一曰借動司庫過有急需難免
權宜借放然未有如督省庫帳之紊雜者或零星湊集並不專借一項或輾轉填補並不隨時歸還如甲
既欠乙乙又欠丙丙或復欠之甲雖有算士法家猝難窮其端緒過有動撥之款坐聽書吏指揮更曰撥
甲則甲吏曰撥乙則乙此皆司吏幕友故作紛糅以爲居奇之地索費之門以致司庫存款孰虛孰實州
縣欠款孰完孰否並無確數今擬擬撥正從流溯源務令本款之有無多少一一披露以後各支各款
不許紛紛借動其有必須移緩就急者宜整勿散刻期歸還即將簿內札庫借撥之條註銷如此則可以
得存款欠款之實而量入爲出之策有所施故以釐正借動爲第四義一曰隱匿督省近日法紀廢弛迺
異他省往往入款出款至數十萬而漫收漫放不奏不詳撫臣並不與聞必待他年報銷而後知則已時
過人非虛實莫辨卽如臣六月十二日所奏查出善後餘款兩起共三十七萬有奇此款從何而來以前
臣衙門並無隻字案據實可駭人聽聞此外牽混之處尙多現仍以次清理又如光緒六七兩年撥解曾
國荃山海關防餉四十八萬兩之內有二十三萬兩直待光緒七年十二月曾國荃撤防半年而後補詳
請奏四十八萬之外又有十萬兩直待本年五月曾國荃來咨造銷而後得知種種參差多不可解鉅款
如此何論其餘現飭司局將各案各項通盤澈查開報並飭按月詳報收支其有動用鉅款及不在例支

之內者隨時詳核庶幾一切均有限制故以稽查隱匿爲第五義蓋籌墊清則度支之數確矣濫支除則
侵盜之風息矣撥抵禁則州縣之虧少矣借動止則書吏之權衰矣起辦奏銷以察新虧除免攤捐以省
司墊裁減浮費以節衆流皆與清查庫欸相爲表裏除隨案分別飭辦外統於此次一律清理夫繁碎縹
緲者吏之所樂而官之所苦也混淆牽搭者盜臣之利而國家之害也能去以上五弊則簡易明白盈
虛在目廢弛過久積案如山首尾二三十年欸目四百餘萬而其事又爲作弊者之所不便必將自計推
宕而阻撓蓋此實爲奸竈窟穴之所藏而帑藏漏卮之所在若不於此著手督省終無理財節用之方也
於上月奏設清源局此項庫欸兵差交代攤捐借欸撥欸各案清查統歸一局辦理庶可通盤呈辦查藩
司方大湜起家州縣利弊熟悉且到任未久無所用其迴護也卽責成該司會同臬司冀寧道並添委補
用道員高崇基督飭司員迅速辦理限以五箇月於年內將各案一律清查完竣相應請 旨嚴戒督省
大小官吏勒限辦理庶各該員知所悚惕不致諉延總期於斷弊絲而挽宏綱塞旁流以歸正派 上諭
張之洞奏督省庫欸陳緒太紛漏額太鉅請設局勒限清查一摺山西歷年以來司庫出入欸目久未清
理皆由軍需督後交代各案弊混太多亟應澈底清查以重庫欸該撫現議劃清籌墊刪除濫支禁止撥
抵盤正借動稽核隱匿所歸甚爲詳盡卽著張之洞責成該藩司等督飭局員認真稽核迅將積年欸項

一律勒限清盤毋任稍有含混倘敢諉延即將該官吏嚴行參辦○予前陣亡參將關鎮邦於廣東省城建祠並賜名慰忠○諭前據御史李鴻逵奏兩江營務處道員王詩正等招權納賄各款當經諭令彭玉麟查奏茲據彭玉麟奏遵有確切查明據實覆陳各摺片覽奏均悉道員王詩正知縣柳葆元雖無狎妓浪遊招權納賄確據惟王詩正總辦兩江營務舉止輕率意氣驕矜行事不檢致招物議實屬不知自愛著卽行革職勒令回籍柳葆元職司文案身處關防嚴密之地何得任意私出閒遊著以府經歷候丞降補以示懲儆其道員張自牧知府郭慶藩被參各節現據查明該員等均在湖南本籍並未前赴兩江卽著毋庸置議又據查出廣西候補知府張崇澍貪鄙性成在兩江捏報商名請領鹽票從中漁利參將劉國瑞經左宗棠派充巡捕竟敢與門丁陰肆鬼蜮實屬貪鄙卑劣張崇澍劉國瑞均著卽行革職永不敘用餘著照所議辦理左宗棠勸望素著向來辦事認真上年陛辭時欽承 懿旨諭令隨時整頓不可輕議更張鹽務爲兩江要政卽使爲規復舊制起見亦應將擬辦情形奏明請旨何得率意徑行致多窒礙嗣後左宗棠惟當遇事虛衷屏除成見於一切用人聽言尤當加意詳慎抉去蘊蔽以期政通人和用副朝廷倚任至意○壬戌卡寶第奏京控交審案件事涉細微及未經本省控告者飭發該道提審情重者親提審訊報聞○原任江蘇巡撫黎培敬卒賜卹如例事蹟交國史館列傳○癸亥 上諭 奉先殿

壽皇殿行禮○頒給山東鄆城縣 關帝 龍神 城隍各廟昌邑縣 龍神 城隍各廟匾額○乙丑
以倭克津泰爲呼蘭副都統○諭通政使司參議嵩溥奏請飭查降補知縣吳欽是否賢員暨倉匪張六
房屋入官一案辦理失當各摺片降補直隸懷來縣知縣吳欽前因御史載彩參經李鴻章查明該員
因案派捐致招物議請以縣丞降補當照該督所請是吳欽被參降補曾有應得業經奏結乃嵩溥輒以
吳欽爲賢員復請飭查已屬非是至倉匪張六卽張鳳儀係同治三年嚴拏未獲之犯嗣後復在花戶身
後把持歷年盤踞倉務本年正月經巡城御史阿彥泰等奏請飭拏該犯畏罪遠颺所遺空房一所查有
石橋地道並起出火鎗腰刀等件是其種種不法確有可憑因將房屋入官乃嵩溥竟敢謂其是否爲匪
尙無確據並稱海運倉向由張六雇備車脚俱照官價給發亦無包攬情弊意在力爲該犯開脫荒謬已
極殊出情理之外嵩溥著交部嚴加議處○李鴻章奏 臣承准軍機大臣字寄七月二十三日奉 上諭
張樹聲奏吳長慶等統領官軍馳至朝鮮國都將李是應獲致現已解送到津著暫行妥爲安置俟李鴻
章到津後會同張樹聲向李是應究出該國變亂緣由及著名亂黨詳細具奏候旨遵行吳長慶現派隊
伍圍攻在尋利泰兩村著飭令該提督穩慎進攻將亂黨渠首迅速掃除一面妥籌防範鎮定人心以安
反側吳長慶所統各營不敷分布現已添調黃金志帶隊前往將來應否添調重兵著李鴻章隨時體察

情形酌量辦理等因欽此仰見 聖謨廣遠綏靖藩邦之至意曷勝欽佩臣於烟臺行次接據提督丁汝

昌道員馬建忠十六十八日稟報自獲送李是應登舟後馬建忠隨請朝鮮國王由其政府將願修舊好

之意函達日本使臣花房義實即派全權大臣李裕元副官金宏集馳赴仁川港會議其亂黨之聚居在

尋利泰二里者約數千人世隸兵籍跋扈難制與李是應勾結一氣迭為變亂今李是應雖已就拘而其

長子載崑以大將新握兵柄仍恐該黨奉以為亂爰於十五日傍晚先將李載崑誘拘南別宮以水兵數

十人守之是夜吳長慶調派副將張光前何乘龍總兵吳兆有率領親兵慶字三營往捕杆尋里亂黨第

搜巢穴短兵巷戰直至天明生擒一百五十餘人其餘悉由屋後竄去我軍帶傷者僅二人其利泰里亂

黨吳長慶親往掩執以地近營址已先期開風遠颺僅獲二十餘人是役共獲一百七十餘人當經訊明

戮其魁首罪狀稍著者十人其餘概交朝鮮酌予釋放俾得從者知為法所不誅藉以潛消反側此次

天威震疊羣凶奔竄老巢既覆則散處四方者不難隨時緝捕而李載崑不安於位亦即於是日請釋兵

柄此朝鮮亂黨已被剿散國勢粗定之大概情形也至日本於中國勘辦朝鮮內亂始終未敢振越尙屬

恪遵公法惟與朝鮮議約以焚館逐使為首藉端要挾多開條款朝鮮既自行派員赴距京八十里之仁

川辦事馬建忠因朝日為多年有約之國其交涉之案未便由中國顧與主持但將其可許不可許各條

預爲指示又適在王京與吳長慶謀靖內亂不逞他顧而朝鮮大臣李裕元等已於十七日與日本定議
簽押核計約款八條尙屬無甚流弊惟賠補日本各費至五十萬圓爲數較多該國王以外患內憂事機
危迫特命其臣迅速了事冀消鄰衅遂有不甘讓之勢猶幸中國水陸各軍聲勢較盛日本隱有所
憚未遽將割地開礦及陸路通商各事強朝鮮以必從此朝日和約既定暫弭衅端之大略情形也臣抵
津後晤商張樹聲以朝鮮事大致就緒續撥黃金志三營自可暫緩前往稍省煩費惟李是應已起解赴
京旋奉暫行安置之旨經張樹聲派員追令折回俟其到津臣當會同張樹聲詳細究問再行奏明辦
理刻下朝鮮王鑒於積弱力圖振作已派全權大臣趙秉夏副官金宏集從事李祖淵等隨同馬建忠丁
汝昌於二十五日抵津謁商一切查朝鮮善後各事關係重要頃緒尙繁容臣與之悉心商度次第酌辦
日本兵船陸軍未撤之先我軍應暫留以坐鎮俾朝鮮有隱然可恃之資現仍留吳長慶統率各營續捕
亂黨並令丁汝昌馳回會商相機妥辦除將丁汝昌等稟單二件馬建忠所錄筆談及朝日約款鈔送總
理衙門備查外所有官軍捕治朝鮮亂黨及該國派員抵津緣由理合會同署直隸督臣張樹聲合詞恭
摺由驛具陳又奏臣等節次欽奉諭旨著會同向李是應究出該國變亂緣由及著名亂黨詳細具奏
候旨遵行等因欽此臣等連日遵旨會同傳見李是應究問該國變亂緣由及著名亂黨語多狡展

堅不吐實當將究問及擬議處置各情先行函達總理各國事務衙門一面復飭津海關道周馥候選道袁保齡馬建忠等再行詳細根究去後茲據該道等稟稱公同傳詢李是應反覆詰問據稱是應癸酉劣前輔政十年各營軍兵按月放餉自閏歲鑄執掌財賦近者軍米十餘朔不發六月初間頒下一朔米以斗小軍兵不受閏歲鑄不思安撫提因濫殺諸軍憤鬧是應聞亂入城挺身曉諭亂軍因殺國相宰臣等三四人詰以伊兄李最應既不管餉又不管兵何以被殺則謂李最應執政數年自失人心當日恐喝軍民以致遇害詰以汝既能定亂當知亂首何人持械先入王宮是何隊兵卒環訴於汝係何姓名則謂初九日軍兵來訴於家幾千百人不知其首圍逼王宮五營咸動不知孰先孰後詰以初九以後汝總持庶務罷機務衙門改武衛營制何以未聞捕治亂黨則謂庶務因國王之託亂黨姓名百方開導絕不供指查朝鮮領選使金允植致周馥書云李是應素日結黨謀逆奪政柄甲戌以來形迹屢著昨年逆魁李載先卽是應之子諸囚供案屢發是應陰謀國王置不欲聞止誅餘黨此次亂起之源由於是應激變乃自稱國太公總攬國樞朝鮮侍讀魚允中致周馥書亦言國政現歸是應亂魁卽是此人金允植又曾與周馥筆談言李是應秉政十年毒虐生民國王年長無意反政舉國不遑聞妃崇用親屬以分其權自是憤毒日增馬建忠與朝鮮吏曹判書趙翼夏鎰談據云今王入承國統後李是應總理國事國王欲親事

務相持許久國政始出於王王妃亦多與聞至閏臘鎬分給軍餉之日米不滿斛軍士與胥役詣關譟鎬
擊囚軍五人欲置於法軍人奔訴於是應昌應以言激之致變初九日殺閏臘鎬金輔鉉是應入關曉諭
諸軍卸總庶務各等語李是應所言如彼朝鮮諸臣所述如此參稽質證此次之變發於亂軍而成於是
應昭昭在人耳目稟請鑒核等情前來等因覆加察核該道等所稟李是應之言與前傳聞時所對略
同至朝鮮諸臣所述並接廣東水師提督吳長慶來函證以該國事後輿論均無異辭此次變亂緣由雖
因軍卒索餉而起惟李是應乃國王之本生父昔當國王冲年專權虐民勉強歸政非其本懷近來怨望
益深上年卽有盜火王宮及其子李載先謀逆情事此次亂軍赴伊家中訴如果正言開導何至遽興大
難朝鮮臣庶皆謂是應激之使變實非無因卽謂此無左證而亂軍圍擊宮禁王妃與雖大臣被害兇焰
已不可嚮邇李是應既能定亂於事後獨不能遏亂於方萌五尺之童亦知其心叵測況乘危竊柄一月
有餘擅作威福樹置私人顧於作亂犯上之徒未嘗一加捕治春秋之義入不討賊其意何居迨臣等傳
旨詰責猶曉曉歸罪於被殺之宰執絕不思軍卒非可殺宰執之人雖亂黨姓名始終不肯供指而衆
論確鑿遁辭知窮黨惡首禍之情人臣無將之義片言可折百喙難逃設非朝廷命將出師赴機迅速
則該國宗社骨肉之變將有不忍言者惟現據趙寧夏等來津面陳該國王欲籲求天恩出予寬宥若

必執法嚴懲在李是應固罪無可辭而該國王亦情難自處第李是應積威震主黨羽繁多與國王王妃及在朝諸臣等久成嫌衅倘再釋回本國奸黨構煽怨毒相尋重植亂萌必爲後患屆時煩煩天討寬典轉不可厯邀況茲貧弱小邦變故亦豈堪再遇是李是應不歸猶可保其家安其國全其父子是應一歸則父子終傷必至害於家因於國而後已也伏查朝鮮史略元代高麗王累世皆以父子構衅延祐年間高麗王諶既爲上王傳位於其子恭交播遷隨元年流諫於吐蕃安置王父俱有前事又至元年間廢子忠惠王名禎亦經元帝流於揭陽縣其時高麗國內晏然徒以胥小浸潤遂窺窮荒今李是應無蒙業垂統之尊有幾危社稷之罪較諫禎等情節尤重惟處人家國父子之間不能不爲兼籌並顧倘蒙聖朝寬大特頒明詔但責其僭稱國太公自行專政既不能於軍人往來時曉諭禁斥又不能於入總庶務後討捕亂黨實屬謬妄格外加恩勅下臣等將李是應安置近京之保定省城永遠不准復回本國優給廩餼識其出入嚴其防閑仍准該國王歲時派員省問以慰其私於以弭該國禍亂之端亦卽以維該國王倫紀之變則聖主義聞仁聲洋溢於海外矣謹陳愚淺以備萬一之慮是否有當伏候採擇施行上諭朝鮮爲我國大清屬國世守藩封素稱恭謹朝廷視同內服休戚相關前據張樹聲奏朝鮮國亂軍生變突於六月間圍佔王宮王妃與雖大臣被戕日本使館亦受其害當諭令張樹聲調派水

陸各軍前往援剿又以李鴻章假期屆滿召赴天津會同查辦旋經提督吳長慶丁汝昌道員馬建忠等率師東渡進抵該國都城擒獲亂黨一百數十人殄厥渠魁赦其脅從旬日之間禍亂悉平人心大定採訪該國輿論咸稱衅起兵丁索餉而激之使變者皆出自李是應主謀經吳長慶等將其解送天津降旨交李鴻章張樹聲究明情由具奏李是應當國王冲年專權虐民惡跡昭著迨致政後日深怨望上年即有伊子李載先謀逆情事此次亂軍初起先赴伊家申訴既不能正言禁止乃於事後擅攬庶務威福自由獨置亂黨於不問及李鴻章等遵旨請訊猶復多方掩飾不肯吐實其為黨惡首禍實屬自取難逃論其積威震主謀危宗社之罪本應執法嚴懲惟念朝鮮國王於李是應誼屬母親若竟置之重典轉令該國王無以自處是用特沛恩施姑從寬減李是應著免其治罪安置直隸保定府地方永不准回國仍著直隸總督優給廩餼嚴其防閑以弭該國禍亂之端即以維該國王宗社之變吳長慶所部官軍仍著暫留朝鮮藉資彈壓該國善後事宜並著李鴻章等悉心商辦用副朝廷酌法準情綏靖藩服至意○諭刑部奏秋審招冊後尾請飭依限題報等語辦理秋審例限禁嚴各省審定實緩後尾向定於五月中旬具題乃本年有遲至六月及七月始行到部者殊屬延玩著各省督撫嗣後審定後尾按照例限題報毋得遲延倘有逾限卽由該部參處以重刑章○裕祿奏潛山等州縣賑撫就緒擬趕修堤壩等工得旨潛

山等處賑撫事宜籌辦尙屬周妥其下游圩堤潰決處所卽著督飭趕緊堵築所有被淹漫各州縣一併妥爲撫卹餘著照所議辦理○予原任雲南巡撫張日鍔入祀名宦祠○丁卯諭前據御史張鴻逵奏吉林委員用事貽害地方當經降旨派崇綺查辦嗣後添派啟秀前往吉林逐款確查會同崇綺詳核覆奏茲據奏稱詳細查明原參委員劉光煜余溶趙光璽等藉餉漁利及抑勒盤剝等款均無其事惟劉光煜余溶審辦民人馬行一案雖無賄兌情弊定案時未提兵弁未得勝質訊實屬疏漏請旨議處等語河南補用知府劉光煜吉林補用同知余溶均著交部照例議處劉光煜余溶趙光璽仍著吉林將軍河南巡撫隨時察看詳加甄核餘著照所議辦理○戊辰 上詣 奉先殿 壽皇殿行禮○予崇慶州節孝婦朱高氏旌表○己巳諭禮部奏接據朝鮮國土來咨轉奏各一摺並鈔錄原咨呈覽該國此次亂軍之變經朝廷發兵戡定深知感激殊堪嘉尙至所稱中情震迫瀝懇天恩准令李昱應歸國一節李昱應以宗屬至親積威震主謀危宗社罪無可追朝廷酌法準情姑從寬減前已明降諭旨擇地安置優給廩餼原屬格外恩施該國王顧念天倫繫懷定省以李昱應年老多疾咨由禮部代奏乞恩詞意迫切自屬人子至情惟李昱應獲罪該國宗社者甚大該國王既承先緒應以宗社爲重不能復顧一己之私所請將李昱應釋回之處著毋庸議仍准其歲時派員省問以慰該國王思慕之情嗣後不得再行濫請該部知

道○諭軍機大臣等翰林院侍讀張佩綸奏請密定東征之策以靖藩服一摺據稱日本貧寒傾危琉球之地久踞不歸朝鮮禍起蕭牆殃及賓館彼狃於琉球故智劫盟索費貪婪無厭今日之事宜因二國爲名令南北洋大臣簡練水師廣造戰船整齊山東兩處宜治兵蓄艦爲南北洋犄角沿海各督撫迅練水陸各軍以備進規日本等語所奏頗爲切要著李鴻章先行通盤籌畫迅速覆奏○曾國荃奏臣於光緒八年六月十三日在湖南衡河舟次承准軍機大臣密寄光緒八年五月二十七日奉 上諭劉長佑杜瑞聯奏通籌相機弭患並增募練軍八營各摺片法越構衅滇粵邊防緊要疊經諭令該督撫等妥爲籌備並前據劉長佑等派員帶兵出境以剿辦土匪爲名相機保護亦經諭令該督撫等體察情形妥籌辦理惟關外事情隨時變易要在詳審緩急機宜妥籌因應著劉長佑杜瑞聯就現在兵力密爲布置藉作聲援免致被族狹焉思逞並飭令道員沈壽榕確切偵探穩慎籌辦不得稍涉張皇其增募練軍八營務當認真訓練俾成勁旅以資調遣會國荃岑毓英此時計已啟程赴任著俟抵任後各將該省水陸邊防事宜悉心規畫通籌全局彼此聯絡聲勢會商妥辦將此由五百里各密諭知之欽此仰見 聖謨廣運訓示周詳跪誦之餘莫名欽悚 臣抵任後當將粵省邊陲地勢水陸要隘一年財賦之出入盈虛全省兵勇之強弱多寡與夫現在一切布置情形檢查案卷並與東撫臣裕寬暨藩臬司道詳細講求咸謂籌邊

莫先於治軍而設防必期於扼要廣東邊境陸路則欽州所屬之東興街地方與越南接壤海道則廉瓊兩郡之洋面與越境沿海處處相通各距數千里之遙本年四月探聞法人攻陷越南河內省城經兼署督臣裕寬選派記名提督黃得勝招募勇二營前往欽州防守已據報到防朝夕訓練其廉瓊一帶洋面兼署督臣先已欽遵諭旨挑選兵輪船六號拖船二號咨會水師提臣吳全美統帶駛赴北海洋面駐紮操防嗣由閩省撥到輪船二艘亦已飭赴該處統歸吳全美督帶以資厚集而壯聲威此粵東辦理水陸邊防之情形也至於東省庫款尤為支絀異常每年籌解京餉協餉已屬萬分竭蹶加以本省應支兵餉及文武養廉緝捕勇糧等項歷年收不敷支頓呼庚癸若議籌辦大隊水師則需多購鐵甲兵輪計非二三百萬不可祇以需款過鉅東省財力物產均有未遑且船廠等項必需購自外洋製造之艱難運送之遲滯計非三四年之久不能得此利器一與之訂議不特目下無此鉅宗給付與造即將來分批償價亦非東粵餉需之所能支且與撫臣裕寬再四籌商擬將督臣張樹聲指定雷艇魚雷洋廠中號次號大礮等件催令善後總局司道先行設法籌款議定價值數目出洋購買此外鐵甲輪船大礮等物則不得不度財量力審慎以出之也近接雲貴督臣劉長佑函稱滇省防軍已至保勝駐紮粵西防軍亦已出關屯守邊境均經該督撫臣奏報在案大抵足與粵東陸路欽州之防師水路廉瓊之輪艦遙為特

角山川雖甚修遠聲勢亦尙聯絡昨據水師提督吳全美咨稱所統師船業已巡弋越南洋面探視外人虛實隨時兩報兩月以來該提督水師靜則以北海冠口爲老營動則駛近越洋巡邏操練如此辦法尙合進止機宜竊維防守邊境之道先在於固結民心次則振作士氣粵東地方俗尙剛強技藝勇敢萬一邊陲有警臨時召募成軍激勵而鼓舞之亦可收敵愾同仇之用徵臣渥厝 恩命糧領海疆謹當勉竭愚忱隨時會商東西兩省撫臣督飭所屬文武各員將水陸邊防事宜悉心規畫並已函致署雲貴督臣岑毓英彼此聯絡聲勢遇事會商施行總期內以救輯邊隅之地外以維繫藩屬之心庶幾險隘無虞仰副我 朝廷柔遠綏邊之至意下該衙門知之○庚午諭陳士杰奏道員擅用公文肆口謾罵請旨懲辦一摺浙江道員上陸樾查荒被讞一案該員前赴嘉興查荒時辦理本涉操切輒復屢次赴京擅控經陳士杰先後查明覆奏已將滋事之莊書等及失察之地方官分別懲處並降旨照陳士杰所擬案結乃該員此次復敢擅用公文以該撫辦理不公徇私庇惡等詞肆言詆罵似此任意妄爲毫無顧忌實屬荒謬已極王陸樾著交部嚴加議處○壬申召孫家穀來京以陳寶箴爲浙江按察使○召胡玉垣來京以孫鳳翔爲安徽按察使○諭瑞聯奏請派員會同承修工程一摺所有 東陵另案專案各工著派閻敬銘敬謹承修○癸酉諭吏部奏遵旨嚴議處分一摺通政使司參議嵩溥著照部議卽行革職○乙亥涂宗

瀛奏湖北羅田沔陽等州縣被水情形並籌款撫卹報聞○丙子 上詣 壽皇殿行禮○子年屆百齡
五世同堂香山縣耆民許麟書旌表○丁丑賞給普濟堂功德林兩處粥廠先期煮賑米石並賞給蘆溝
橋粥廠資善堂煖廠米石○諭上年彗星見於西北降旨諭令內外臣工各勤職守本月中旬彗星復見
於東南此必用人行政時多闕失於閭閻疾苦未盡上聞以致 吳蒼示警深宮修省兢惕難安方今時
事艱難民生未裕各省窮黎正待撫綏我君臣亟應倍矢愛勸勵精圖治爾在廷諸臣各宜共效公忠力
戒因循積習各直省督撫均有察吏安民之責務當實事求是力圖振作屬員有不職者隨時參辦毋得
稍事姑容並各就地方情形悉心訪查認真核度以期利無不興弊無不除朝廷考察督撫惟視該省吏
治民生以爲殿最其各力挽頽風毋稍玩忽庶幾關防整肅百姓乂安迺 天和而消沴厲用副遇災修
省至意○洪良品奏 臣聞天變之興皆由人事之應未有政事不闕於下而災沴屢見於上者也去歲六
月彗星見於北方今年各省大水人民流離頃彗星復出東方形如匹練尾長數丈直指西南日將出時
其光熒熒幾與爭曜 臣雖不諳占驗之術然博觀載籍皆云政失於此而後變見於彼是故漢廷水患策
免三公宋室宮災罷黜首相良以職司變理咎不容辭方今 皇太后垂簾聽政 皇上冲齡典學所與
贊襄共治者賴此二三樞臣耳樞臣苟得其人庶政何憂不理 臣雖不敢謂樞臣中盡皆負 恩資利之

人然其中有一二員 恩賁利者已足以蔽弊於無形而大爲政治之竊 前聞邸鈔見御史陳啟泰奏
雲南報銷一案賄說者太常寺卿周瑞清已奉 旨撤出軍機章京職候查辦矣然臣續有風聞有爲陳
啟泰所未及言者近日外間聞傳雲南報銷戶部索賄銀十三萬兩因國敬銘將到恐其持正駁詰始以
八萬金了事景廉王文韶均受賂遺鉅萬餘皆按股朋分物議沸騰衆口一辭不獨臣一人聞之通國皆
知之蓋事經敗露衆目難掩遂致傳說紛紛臣竊思奏銷關度支大計數十年積弊相仍全賴主計之臣
整頓以挽錮習景廉久經軍務王文韶歷任封圻皆深知此中情弊者使其毫無所染何難秉公稽核立
破其奸乃甘心受其賄賂爲之掩飾彌縫以主持國計之人先爲罔利營私之舉何以責夫貪吏之藉勢
侵漁蠹胥之乘機勒索者也況二人皆樞垣重臣樞垣者天下政令所從出也以二臣而究利權且舞弊
如此以二臣而究政權則其叢脞可知故人事不謹於下遂使天象屢察於上變不虛生此非 皇太后
及我 皇上之過也以二臣所爲揆之不二臣之是過而誰過哉合無請 旨立賜罷斥以儆欺蒙以塞
災咎抑或照周瑞清例撤出軍機一併聽候查辦伏候 聖裁非微臣所敢擅擬夫天道無常人事有憑
前日之樞垣用倭仁文祥而大難可平今日之樞垣用景廉王文韶而災沴屢見感應之機捷如影響此
微臣所不能不過災滋懼披瀝上陳者也 上諭御史洪良品奏雲南報銷一案戶部需索賄銀景廉王

文韶均受賂遺鉅萬等語覽奏殊深詫異事爲朝廷體制重臣名節所關諒洪良品不敢以無據之詞率行入奏著派惇親王翁同龢飭傳該御史詳加詢問務得確實憑據卽行覆奏○德潤奏江西民風純樸撫綏較易前任撫臣劉坤一劉秉璋以廉靜倡率屬僚吏治日有起色至李文敏擢任封圻以來外則恪守舊章內則徇私意而屬吏遂窺其隙而逢迎之欺其愚而朦蔽之因緣爲奸百姓陰受其荼毒光緒七年六月十八日前兵部侍郎彭玉麟查明江西總兵童萬瞻王永勝知府潘駿章知縣楊春澤等貧劣各款奏請分別懲處奉 上諭江西巡撫李文敏於所屬各員種種劣跡毫無覺察著交部議處欽此在皇上量予薄懲原赦其自新之路詎該撫罔知振刷仍安其昏闇之常凡行政用人動多謬妄通省呼爲李糊塗其曖昧不可得而知矣至於劣跡顯著者不特該省家喻戶曉久已流播都門且謠擬要贖列四條爲罪 皇太后 皇上敬陳之一曰信用私人江西候補道喬廷樞與在籍巨紳朱延春劉於澤結爲兒女姻親在該省廣置產業同治十二年經道員王德機稟控劉坤一批司查覆有案以喬廷樞聲名狼藉該撫不爲參劾已屬有意姑容轉認爲山陝同鄉大加倚任無事不與密商並聞該道遣人在贛州一帶販運木植人有謂該撫亦有股分者候補知府王之藩辦理湖口釐局弊竇叢生商民怨怒前奉旨飭撫臣密查該撫先委九江府達春布就近查辦達春布據實稟聞該撫意存袒護實將所稟置之不

論另委道員繼德榮復查該道仰體其意化有爲無該撫遂掩飾覆奏其先後稟擬兩歧閩省共見共聞此信用私人之較著者也一曰倚任劣幕幕友高隆謙盤踞撫署十有餘年恃勢招搖家貲鉅萬凡府州縣署中刑錢兩席非高隆謙所薦未有敢延請者該省劣員多半交通該幕以爲賈緣地步總兵江宗夏素善鑽謀曾以重金賄該幕關說得派陸軍統領差事其胞弟高隆謙改換父名捐指江西知縣甫一到省屢獲差知縣孟慶雲係其至戚前在豐城任內虧空銀二萬餘兩經該幕上下其手巧移填抵並派令知縣王懋寶幫繳交代銀八千兩方行接署斯缺把持舞弊物議譁然此倚任劣幕之較著者也一曰才具太短該撫素無幹濟之才略而又執拗性成不肯虛衷採納去歲獨出己見移建倉廩虛糜鉅款旋以不適於用籌費另築通省傳爲笑談卽以漕糧而論自同治十三年改章而後光緒元二年尙可徵銀一百二三十萬兩迄後逐年遞減至今祇收七十餘萬兩合計每年已少三十餘萬兩推原其故皆由督辦無方不以國計爲急遂令正額日虧至於剿吏勤恤民隱無事之時正宜督率牧令講求水利乃於伐蛟諸事堤堰各工平日毫無准備以致洪流巨浸貽害閭閻此才具太短之較著者也一曰行止不端該撫於六年十一月間囑其巡捕張竹蓀與布經歷楊震清代買民女爲妾給身價銀三百兩月餘復退出交南昌令追回原價輾轉日久始清七年三月復買新建民人熊姓曾經許字之女卽楊小蓮之義女

爲妾熊姓因此與楊小蓮構訟經舉人漆逢原出福並向在撫署之熊老十等多人調處方得息事此二節舉國喧傳並貼有揭帖訕笑又聞傳誦竹枝詞二十五首隱含譏諷此行止不端之較著者也有此四端故品望日益輕紀綱日益廢竊恐久任封圻終爲民生之累可否 欽派大員前往查辦以肅吏治而重地方又聞彭玉麟關心民瘼凡沿江一帶民生疾苦輒吏賢否無不周知抑或卽交該侍郎查辦之處伏候 聖裁 上諭軍機大臣等有人奏疆吏昏庸溺職請旨查辦一摺著左宗棠確切查明據實具奏原摺著鈔給閱看○己卯以恭壽爲杭州副都統○諭惇親王等奏遵保在工人員開單呈覽並將監督等官獎勵各摺片 著祥峪 定東陵寶城神路營房工程經承修王大臣等督率各員敬謹將事悉臻妥協現在各工完竣在工出力人員均屬著有微勞欽天監左監副陳希齡著以五品京堂用光祿寺卿阿克丹著賞給二品頂戴其餘各員升均著照所請獎勵該部知道單二件併發○庚辰諭給事中樓馨普奏請疏通教官知縣補缺班次一摺著吏部議奏○諭給事中樓馨普奏浙江寧波府鹽局委員楊叔懌於慈谿縣淹浦地方創立分局商民譁然幾至激成事端勒令淹浦牙行每年認捐錢一千串作爲定則請旨飭查等語事關委員添局勒捐擾累閭閻亟應查明懲辦著陳士杰確查淹浦地方如果創立鹽金分局名目勒認捐錢應卽裁撤並將委員楊叔懌嚴行參處○奕詝翁同龢等奏本月二十四日內閣

奉 上諭御史洪良品奏雲南報銷一案戶部需索賄銀景廉王文韶均受賂遺鉅萬等語覽奏殊深詫異事爲朝廷體制重臣名節所關諒洪良品不敢以無據之詞率行入奏著派惲親王翁同龢飭傳該御史詳加詢問務得確實憑據卽行覆奏欽此 臣等當卽於二十五日行文都察院飭傳該御史於二十六日至宗人府署中面加詢問卽據該御史呈出親筆說帖一件內開戶部索賄有乾盛亨天順祥帳簿可據又稱賄託之實當問之崔尊慈潘英章關說之實當問之周瑞清等語 臣等問以景廉王文韶俱係大臣若果受賂當必有過付之人交納之地不妨一一指實以便入奏該御史聲稱此等詭秘之事豈有令御史聞知之理實因物議沸騰並非無端誣讒 臣等又問以此等物議究竟何人所傳亦不妨確指數人以爲證據該御史聲稱言者極多或係士大夫或係商賈萬口一辭不能指定何人所說 臣等再四推求從容詰問該御史總稱一切情事已詳說帖中此外更無憑據並稱御史有風聞言事之責既有所聞不敢不據實陳奏等語 臣等謹將詳詢御史洪良品面述情形並該御史親筆說帖一件一併恭呈 御覽雲南道監察御史洪良品謹呈八月二十四日奉 上諭御史洪良品奏雲南報銷一案等因欽此聞命之下不勝惶悚竊維賄賂之事蹤跡詭秘良品不在事中自無從得其底蘊但此案戶部索賄景繁現經刑部取有乾盛亨天順祥帳簿確據前御史陳啟泰奏崔尊慈潘英章交通周瑞清賄託關說外間喧

傳賄託者卽賄託景廉王文韶也關說者卽向景廉王文韶關說也巷議街談萬口如一足賄託之實據
當問之崔尊繇潘英章關說之實據當問之周瑞清然則景廉王文韶受賄非無據也崔尊繇潘英章卽
其據良品非無據而率奏也人人所言卽其據以樞臣而大招物議是謂負 恩聞人言而不以奏 聞
是謂渥職且御史例以風聞言事使天變不言人言亦不言亦安用此尸素御史爲耶良品與景廉王文
韶素無往來亦無嫌怨使非因物議沸騰何敢無端誣讟實見時事艱難天象如此示變人言如此確鑿
故不能不據實以奏請 旨一併查辦屢訊崔尊繇潘英章所有票號十餘萬兩用於何處交於何人則
此案自然水落石出矣謹具說帖上陳 上諭惇親王翁同龢奏遵旨詳詢御史洪良品據實覆奏一摺
並將該御史所遞說帖呈覽據洪良品稱雲南報銷一案外間喧傳崔尊繇潘英章交迫周瑞清向景廉
王文韶賄託關說此外更無憑據等語此案必須崔尊繇潘英章到案與周瑞清及戶部承辦司員並書
吏號商等當面質對庶案情虛實不難立見前經明降諭旨令雲貴總督雲南安徽巡撫飭令崔尊繇潘
英章赴部候質並由四百里寄諭該督撫等以期迅速現在崔尊繇潘英章尚未到案著該督撫等迅卽
具解送來京不准稍有遲延所有在逃之戶部書吏仍著步軍統領衙門順天府五城御史上緊嚴拿
務獲仍著麟書洛祖蔭將此案澈底根究務期水落石出以成信獻○杜瑞聯奏路南石屏二州兩盜被

災情形報聞○辛巳諭徐桐等奏策題錯誤自行檢舉一摺徐桐烏拉高崇阿畢道達孫家鼐均著交部議處○壬午銘安奏新設各官廉俸役食辦公工程等項請發實銀允之○癸未諭此次考試孝廉方正于心如一名竟將試卷墨污狼藉任意撕毀荒謬已極于心如著即行斥革原保之員著該部查取職名照例議處